


T5237.48/4401(3)



全五代詩卷十二

羅江李調元雨村編



晉

裴皞

皞字司東河東人唐光化中進士第歷事梁唐
至晉高祖官至工部尚書拜右僕射卒年八十

五贈太子太保

五代史皞以文學在朝廷久宰相馬允孫桑維翰皆皞禮部所放進士也後允孫知舉放榜引

新進士詣皞皞喜作詩曰門生門下見門生世傳以為榮維翰已作相常過皞皞不迎不送人或問之皞曰我見桑公於中書庶寮也桑公見我於私第門生也何送迎之有人亦以為當

示門生馬侍郎允孫

宦途最重是文衡天與愚夫著盛名三主禮闈年八十
門生門下見門生

崔 棧

棧字子文深州安平人梁貞明三年舉進士甲

科開封尹王瓚辟掌奏記唐明宗拜翰林學士

晉高祖時以戶部侍郎為學士承旨拜尚書左

丞遷太常卿改太子賓客分司西京卒五代史棧為學士嘗

草制為宰相桑維翰所改力爭之維翰不樂棧知天福二年貢舉時有進士孔英者素不與棧行為當時所惡棧初受命往見維翰維翰素貴尊嚴而語簡謂棧曰孔英來矣棧不諭其意以謂為孔英先容乃考英及第物議大以為非遂罷學士職 五代會要晉天福四年十二月太常奏正至王公上壽皇帝舉酒奏元同之樂白帝三飲皆奏文同之樂食舉奏昭德之舞次奏成功之舞皇帝降坐奏大同之樂其辭並崔棧造唐餘錄曰

天福五年十一月夕至朝羣臣舉觴奏元同三爵登歌奏文同四爵登歌作羣臣飲官縣樂作又奏龜茲及霓裳法曲以須食畢於時衆聞龜茲法曲雅鄭雜糅固已非之明年正旦上壽登歌發聲悲離煩慙如虞殞薤露之音觀者以為不祥

羣臣酒行歌

劍佩儼如林齊傾拱北心渥恩頒美祿咸獲聽和音一
德君臣合重瞳日月臨歌時兼樂聖唯待贊泥金
萬國咸歸禹干官共祝堯拜恩瞻鳳宸傾耳聽雲韶運
啟金行遠時和玉燭調酒酣齊抃舞同賀聖明朝
令節陳高會羣臣侍御筵玉墀留愛景金殿靄祥烟振
鷺涵天澤靈禽下樂懸聖明無一事何處讓堯年

李 濤

濤字信臣避地湖南事馬殷後唐天成初舉進士仕晉為中書舍人後歷事漢晉周至平章事

入宋卒

唐據言濤有句云溪聲長在耳山色不離門又掃地樹留影拂林琴有聲又落日長安道秋槐滿地花 吟窗雜錄

諫晉主不從作詩云一言牖主寧復聽三諫不從歸去來 石林詩話云俗稱社日飲酒治聾時為翰林學士有月給內庫酒故濤從乞之詩云春社從李昉乞酒社公今日沒心情為乞治聾酒一瓶惱亂玉堂將欲編依稀巡到第三廳社公濤小字濤性滑稽泥水關有僧每過必省未幾寺焚僧散因題詩云走却坐禪客後將不動尊世間顛倒事八萬四千門 又濤弟澣娶實尚書女年四七高出參濤望塵下拜曰只將謂親家母又作歇後語云慙無實建魏作梁山聞者莫不絕倒

春晝回文

茶餅嚼時香透齒水沈燒處碧凝烟紗窗閉着猶慵起極困新晴乍雨天

李澣

澣字日新濤之弟後唐天成中擢進士第仕晉

為翰林學士所著有丁年集

彈塵後錄五代李濤與弟澣俱負才望澣仕石晉為

學士濤在西掖緝紳榮之澣後仕契丹通顯 宋史澣幼聰敏慕王楊盧駱為文章後代唐侍郎楊凝式撰錢鏐王神道碑文彩道麗時輩稱之

蒙求

王戎簡要裴楷清通孔明卧龍呂望非熊楊震關西丁寬易東謝安高潔王導公忠匡衡鑿壁孫敬閉戶鄧都蒼鷹甯成乳虎周嵩狼抗梁冀跋扈郝超顧參王珣短簿伏波標柱博望尋河李陵初詩田橫感歌武仲不休士衡患多桓譚非讖王商止訛嵇呂命駕程孔傾蓋劇

孟一敵周處三害胡廣補闕袁安倚賴黃霸政殊梁習
治最墨子悲絲楊朱泣岐朱博烏集蕭芝雉隨杜后生
齒靈王出髭賈誼忌鵬莊周畏犧燕昭築臺鄭莊置驛
權靖二妙岳湛連璧郗詵一枝戴馮重席鄒陽長裾王
符逢掖鳴鶴日下士龍雲間晉宣狼顧漢祖龍顏鮑靚
記井羊祐識環仲容青雲叔夜玉山毛義捧檄子路負
米江革忠孝王覽友弟蕭何定律叔孫制禮葛豐刺舉
息躬歷詆管寧割席和嶠專車時苗留犢羊續懸魚樊
噲排闥辛毘引裾孫楚漱石郝隆曬書枚臯詣闕充國
自贊王衍風鑑許劭月旦賀循儒宗孫綽才冠太叔辨

洽摯仲辭翰山濤識量毛玠公方袁盎却座衛瓘撫牀
于公高門曹參趣裝庶女振風鄒衍降霜范丹生塵晏
嬰脫粟詰汾興魏鼈靈王蜀不疑誣金卞和泣玉檀卿
沐猴謝尚鳩鵲泰初日月季野陽秋荀陳德星李郭仙
舟王忱繡被張氏銅鈎丁公遽戮雍齒先侯陳雷膠漆
范張鷄黍周侯山嶽會稽霞舉季布一諾阮瞻三語郭
文游山袁宏泊渚黃琬對日秦宓論天孟軻養素揚雄
草元向秀聞笛伯牙絕弦郭槐自屈南郡猶憐魯恭馴
雉宋均去獸廣客蛇影殷師牛鬪元禮模楷季彥領袖
魯褒錢神崔烈銅臭梁竦廟食趙溫雄飛枚乘蒲輪鄭

均白衣陵母伏劍軻親斷機齊后破環謝女解圍鑿齒
尺牘荀勗音律胡威推繹陸績懷橘羅含吞鳥江淹夢
筆李廌清貞劉麟高率蔣詡三徑許由一瓢楊僕移閔
杜預建橋壽王議鼎杜林駁堯西施捧心孫壽折腰靈
輒扶輪魏顥結草逸少傾寫平子絕倒澹臺毀髀子罕
辭寶東平為善司馬稱好公超霧市魯般雲梯田單火
牛江道熱雞蔡裔殞盜張遼止啼陳平多轍李廣成蹊
陳遵投轄山簡倒載淵客泣珠交甫解佩龔勝不屈孫
寶自劾呂安題鳳子猷訪戴董宣彊項翟璜直言紀昌
貫蠶養由號援馮衍歸里張昭塞門蘇韶鬼靈盧元幽

婚震畏四知秉去三惑柳下直道叔敖陰德張湯巧詆
松周深刻三王尹京二鮑糾憲孫康映雪車允聚螢李
充四部井春五經谷永筆札顧愷丹青戴逵破琴謝敷
應星阮宣杖頭畢卓甕瓦下文伯羞鬻龜孟宗寄鮓史丹青
蒲張湛白馬隱之感隣王脩輟社阮放八雋江鳧四凶
華歆忤旨陳羣感容王濬懸方丁固生松姜維膽斗盧
植音鐘桓溫竒骨鄧艾大志楊脩捷對羅友默記杜康
造酒蒼頡制字樛里智囊邊韶經笥滕公佳城王果石
崖買妻耻醮澤室犯齋馬后大練孟光荆釵顏叔秉燭
宋宏不諧鄧通銅山郭況金穴秦彭攀轅侯霸臥轍淳

于炙輠彥國吐屑太真玉臺武子金埒巫馬戴星宓賤
彈琴郝廉留錢雷義送金逢萌挂冠胡昭投簪王喬雙
鳥華佗五禽程邈隸書史籀大篆王承魚盜丙吉牛喘
賈琮褰帷郭賀露寬馮媛當熊班女辭輦王充閱市董
生下帷平叔傅粉宏治凝脂楊生黃雀毛子白龜宿瘤
采桑漆室憂葵韋賢滿觥夏侯拾芥阮簡曠達袁耽後
邁蘇武持節鄭眾不拜郭巨將坑董永自賣仲連蹈海
范蠡泛湖文寶緝柳温舒截蒲伯道無兒嵇紹不孤綠
珠墜樓文君當壚伊尹負鼎甯戚叩角趙壹坎壈顏驥
蹇剝龍龔遂勸農文翁興學晏御揚揚五鹿嶽嶽蕭朱結

綬王貢彈冠龐統展驥仇覽栖鸞葛亮顧廬韓信升壇
王褒柏慘閔損衣單蒙恬製筆蔡倫造紙孔伋緼袍祭
尊布被周公握髮蔡邕倒屣王敦傾室紀瞻出妓暴勝
持斧張綱埋輪靈運曲笠林宗折巾屈原澤畔漁父江
濱魏勃埽門潘岳望塵京房推律翼奉觀性甘寧奢侈
陸凱貴盛干木富義於陵辭聘元凱傳癖伯英草聖馮
異大樹千秋小車漂母進食孫鍾設瓜壺公謫天薊訓
歷家劉元刮席晉惠聞墓伊籍一拜鄴生長揖馬安四
至應璩三入郭解借交朱家脫急虞延剋期盛吉垂泣
豫讓吞炭鉏麴觸槐阮孚蠟屐祖約好財初平起石左

金華仙言
卷十一
慈擲杯武陵桃源劉阮天台王儉墜車褚淵落水季倫
錦障春申珠履甄后出拜劉楨平視胡嬪爭擣晉武傷
指石慶數馬孔光溫樹翟湯隱操許詢勝具優旃滑稽
落下歷數曼容自免子平畢娶師曠清耳離婁明目仲
文照鏡臨江折軸樂巴喫酒偃師舞木德潤傭書君平
賣卜叔寶玉潤彥輔冰清衛后髮鬢飛燕體輕元石沈
酒劉伶解醒趙勝謝躡楚莊絕纓惡來多力飛廉善走
趙孟疵面田駢天口張憑理窟喪顏談數仲宣獨步子
建八斗廣漢鉤距宏羊心計衛青拜幕去病辭第鄺寄
賣友紀信詐帝濟叔不癡周元無慧虞卿擔簦蘇章負

笈南風擲孛商受斲涉廣德從橋君章拒獵應奉五行
安世三篋相如題柱終軍棄繻孫晨橐席原憲桑樞端
木辭金鍾離委珠季札挂劍徐穉致芻朱雲折檻申屠
斷鞅衛玠羊車王恭鶴氅管仲隨馬蒼舒稱象丁蘭刻
木伯瑜泣杖陳逵豪爽田方簡傲黃向訪主陳實遺盜
龐儉鑿井陰方祀竈韓壽竊香王濛市帽句踐投醪陸
抗嘗藥孔愉放龜張顥隨鵲田豫儉素李恂清約義縱
攻剽周陽暴虐孟陽擲瓦賈氏如臯顏回簞瓢仲蔚蓬
蒿糜竺收資桓溫登高雷煥送劍呂虔佩刀老萊斑衣
黃香扇枕王祥守柩蔡順分椹淮南食時左思十稔劉

快傾釀孝伯痛飲女媧補天長房縮地季珪士首長孺
 國器陸玩無人賈誦非次何晏神伏郭奕心醉常林帶
 經高鳳漂麥孟嘉落帽庾凱隋憤龍逢板出張華台圻
 董奉活變扁鵲起號冠恂借一何武去思韓子孤憤梁
 鴻五噫蔡琰辨琴王粲覆棊西門投巫何謙焚祠孟嘗
 還珠劉昆反火姜肱共被孔融讓果端康相代亮陟隔
 坐趙倫鷓怪梁孝牛禍桓典避馬王尊叱馭鼃錯峭直
 趙禹廉倨亮遺巾幘備失七箸張翰適意陶潛歸去魏
 諸南館漢相東閣楚元置醴陳蕃下榻廣利泉湧王霸
 冰合孔融坐滿鄭崇門雜張堪折轅周鎮漏船郭伋竹

馬劉寬蒲鞭許史侯盛韋平相延雍伯種玉黃尋飛錢
 王允千里黃憲萬頃虞駿才望戴淵鋒穎史魚黜殞子
 囊城郢戴封積薪耿恭拜井汲黯開倉馮驩折券齊景
 駟千何曾食萬顧榮錫炙田文比飯稚珪蛙鳴彥倫鶴
 怨廉頗負荆須賈擢髮孔翊絕書申嘉私謁淵明把菊
 真長望月子房取履釋之結鞅郭丹約閔祖逖誓江賈
 遠問事許慎無雙婁敬和親白起坑降蕭史鳳臺宋宗
 雞窗王陽囊衣馬援惹苾劉整交質五倫十起張敞畫
 省謝鯤折齒盛彥感螯姜詩躍鯉宗資主諾成璠坐嘯
 伯成辭耕嚴陵去釣董遇三餘譙周獨笑將閭仰天王

凌呼廟二疏散金陸賈分臺慈明八龍彌衡一鶚不占
隕車子雲投閣魏舒堂堂周舍諤諤無鹽如漆姑射若
冰邾子投火王思怒蠅符朗阜白易牙淄澠周勃織薄
灌嬰販繒馬良白眉阮籍青眼黥布開關張良燒棧陳
遺飯感陶侃酒限楚昭萍實束皙竹簡曼倩三冬陳思
七步劉寵一錢廉范五袴汜毓字孤郁鑿吐哺荀弟轉
酷嚴母埽墓洪喬擲水陳泰挂壁左述忽狷荀粲惑溺
宋女愈謹敬姜猶績鮑照篇翰陳琳書檄浩浩萬古不
可備甄芟繁撫華爾曹勉旃

留題座主和凝舊閣

座主登庸歸鳳闕門生批詔立鰲頭玉堂舊閣多珍玩
可作西齋潤筆不

楊昭儉

昭儉後唐長興中進士殿中丞侍御史事石晉
為翰林學士入宋官尚書卒

贈夢英大師

紀贈歌詩數百人序師多藝各求新未言篆隸飛龍鳳
且說風騷感鬼神琴有古聲清耳目鶴無凡態惹埃塵
英公所學還如此不錯承恩近紫宸

題家園

金五代詩 卷十一
池蓮憔悴無顏色園竹低垂減翠陰園竹池蓮莫惆悵
相看恰似主人心

鄭遨

遨字雲叟滑州白馬人昭宗時舉進士不第入
少室山為道士徙居華陰種田自給與道士李
道殷羅隱之友善世目為三高士晉高祖以諫
議大夫召不起遂賜號逍遙先生天福中卒年

七十四

三山老人語錄五代時鄭遨茶詩云維憂碧粉散嘗見綠
花生范文正公詩云黃金碾畔綠塵飛碧玉甌中翠濤起

茶色以白為貴二公皆以碧綠言之何耶

詩話鄭微君詩皆祛滌靡迴結其意塵

山居

悶見有人尋移庵更入深落花流澗水明月照松林醉
勸頭陀酒閑教孺子吟身同雲外鶴斷得世塵侵
冥心棲太室散髮浸流泉採柏時逢麝看雲忽見山夏
狂衝雨戲春醉戴花眠絕頂登雲望東都一點烟
不求朝野知卧見歲華移採藥歸侵夜聽松飯過時荷
竿尋水釣背局上巖碁祭廟人來說中原正亂離

茶

嫩芽香且靈吾謂草中英夜白和烟搗寒鑪對雪烹惟
憂碧粉散常見綠花生最是堪珍重能令睡思清

富貴曲

美人梳洗時滿頭間珠翠豈知兩片雲戴却數鄉稅
傷農

一粒紅稻飯幾滴牛領血珊瑚枝下人銜杯吐不歇

詠西施

素面已云妖更著花鈿飾臉橫一寸波浸破吳王國

思山詠

因賣丹砂下白雲鹿裘惟惹九衢塵不如將爾入山去
萬是千非愁殺人

招友人遊春

難把長繩繫日烏芳時偷一收醉工夫任堆金壁磨星斗

因賣丹砂下白雲鹿裘惟惹九衢塵不如將爾入山去
萬是千非愁殺人

招友人遊春

難把長繩繫日烏芳時偷取醉工夫任堆金壁磨星斗
買得花枝不老無

宿洞庭

月到君山酒半醒朗吟疑有水仙聽無人識我真閑事
贏得高秋看洞庭

題病僧寮

佛前香印廢晨燒金錫當門照寂寥童子不知師病困

報風吹折好芭蕉

題霍山秦尊師

老鶴元猿伴採芝有時長歎獨移時翠娥紅粉渾如劍
殺盡世人人不知

偶題

似鶴如雲一箇身不憂家國不憂貧擬將枕上日高睡
賣與世間榮貴人

帆力劈開滄海浪馬蹄踏破亂山青浮名浮利濃如酒
醉得人心死不醒

景福中作

悶見戈鋌匝四溟恨無奇策救生靈如何飲酒得長醉
直到太平時節醒

與羅隱之聯句

一壺天上有名物兩個世間無事人
遊醉却隱之雲叟
外不知何處是天真隱之

使北者

墨鳥詩

五代詩話幽薊數州自石晉賂戎後懷中華不已有
仙山者見燕中傅舍壁畫墨鳥甚工旁題詩云云

要識塗鴉意栖遲未得歸星稀月明夜皆欲向南飛

調元按原

本只有下二句上二句應是
後人附會姑並存以俟攷

天嶠遊人

題鄧仙客墓

鄧仙客晉延康代為國師錫紫服葬麻姑山

鶴老芝田雞在籠上清那與俗塵同既言白日升仙去
何事人間有殯宮

馬重績繇辭

占隨卦繇辭

重績明于數術晉高祖時為司天監從廢反命筮之遇隨重績語其繇云歲將秋矣無能為也七月而從廢果敗

南瞻析木木不自續虛而動之動隨其覆

遼述律后謠

青牛嫗曾避路

遼太祖后述律氏生而有雄畧嘗至遼土二河之會有女子乘青牛車倉卒辟路忽不見未幾童謠云云諺謂地祇為青

牛嫗後果配太祖解地皇后云

晉出帝詠天詩

青異錄晉出帝不善詩時為俳諧語詠天詩云云

高平上監碧翁翁

晉朝響樂章

初舉酒文同樂

赫矣昌運明哉聖王文興隆典禮復舊章鴛鴦濟濟鳥
獸蹌蹌一人有慶萬壽無疆

舉酒

大明御宇至德動天君臣慶會禮樂昭宣劔佩成列金
石在縣榭觴再獻寶歷萬年

再舉酒

朝野無事寰瀛大康聖人有作盛禮重光萬國執玉千

官奉觴南山永固地久天長

四舉酒

八表歡無事三秋賀有成
照臨同日遠渥澤並雲行
河變千年色山呼萬歲聲
願修封岱禮方以稱文明

晉昭德成功舞歌

唐餘錄晉天福五年詔有司復修正至朝會二舞之制以文舞為昭德之舞武舞為成功之舞

十一月冬至遂奏之於時二舞久廢眾喜於復興而樂工舞負雜取教坊以滿之聲節靡曼綴北合節而無速促遲速之累及明年正旦再奏聲容踴厲進退無列議者非之五代史樂志曰文武六十四人左手執籥右手秉翟冠進賢冠服黃紗袍白紗中單皂領標白練襪襠白布大口袴草帶烏皮履白布襪武舞六十四人左手執干右手執戚服弁平巾幘金支緋絲布大袖緋絲布兩襠甲金飾白練襪襠錦騰蛇起梁帶豹文大口布袴烏皮靴

昭德舞歌二首

聖代修文德明庭舉舊章
兩階陳羽籥萬舞合宮商
劒

佩森鴛鴦簫韶下鳳凰
我朝青史亘千古有輝光

淮海干戈戢朝廷禮樂施
白駒皆就繫丹鳳復來儀
德備三苗格風行萬國隨
小臣同百獸率舞賀昌期

武功舞歌二首

撥亂資英主開基自晉陽
一戎成大業七德煥前王
炎漢提封遠姬周世祚長
朱干將玉戚全象武功揚
睿算超前古神功格上圓
百川留禹跡萬國戴堯天
既已橐弓矢誠宜播管弦
踰踰隨鳥獸共樂太平年

首 百 未

全五代詩卷十三

羅江李調元雨村 編

漢

張 昭

昭本名昭遠避漢祖諱止稱昭字潛夫濮州范
縣人歷仕唐晉至漢為兵部尚書封舒國公入

宋卒有嘉善集

宋史昭既冠以父失所在時益賊竄起道路榛梗乃自秦抵蜀徒行丐食求父所在積十年不能得

乃發哀行服躬耕海濱青州王師範開學館延至儒士再以書幣招置署賓職師範降梁直脫難止歸以周易春秋教授學者自遠而至時號道遙
先生昭始十歲能誦古樂府詠史詩百餘篇未冠編讀九經盡通其義
處濟類中緩步開視以為馬鄭不以若也後至贊皇遇程生者專史學以
為專究經旨不通今古率多拘滯繁而寡要若極談王霸經緯治亂非
史不可因出班范漢書十餘義商榷乃授昭荀紀國志等後又盡得十三

史五七年間能馳騁上下數千百年事又注十代興亡論處亂世躬耕負米以養親後父卒服闋召為戶部侍郎以唐史未成詔與呂琦崔悅等續成之別置史館命昭憲判院事昭又撰唐朝君臣正論二十五卷上之改兵部侍郎八年遷吏部判東銓兼史館修撰判館事開運二年秋唐書成二百卷加金紫塔進爵邑三年拜尚書右丞判流內銓權知貢舉漢初復為吏部侍郎時追尊六廟定謚號樂章武曲命昭權判太常卿事月餘即真乾祐二年加檢校禮部尚書少帝年十九猶有童心昭比羣小昭上言請聽政之暇數召儒臣講論經義云

漢宗廟樂舞辭

高廟明靈再啟圖金根玉輅幸神都巢阿丹鳳銜書命
 入昴飛星獻寶符正撫薰弦娛赤子忽登仙駕泣蒼梧
 薦櫻鶴館笳簫咽酌卷金楹劍珮趨星俎雲壘兼魯禮
 朱干象箭雜巴渝氤氳龍麝交情瑣髣髴錫鑿下藥珠
 薦豆奉觴親玉几配天人合祖耀璿樞受釐飲酒皇歡洽

仰俟餘靈泰九區

夜吟竇鞏集追思古門題處已三稔矣悽然感興
 書之

往歲記時梁苑夜今宵題處洛城秋浮生瞥電人何在
 懷舊傷心淚迸流三徑竹風隣笛怨一庭霜月井梧愁
 妻兒未會予惆悵只怪燈前不舉頭

王仁裕

仁裕字德輦天水人初為秦州判官入蜀為中
 書舍人翰林學士歷唐晉至漢為戶部尚書太
 子少保致仕卒所作有西江集

十國春秋仁裕少時嘗夢剖其腸胃以西江水滌之

顧見江中沙石皆成篆籀之文由是文思日進生平作詩逾萬首蜀人呼曰詩罈子 宋事寔類苑王公終於太子太保七十後精力不衰每天氣和暖必乘小駟從二四老蒼頭攜照袋以皮為之四方有蓋其中可容一斗以來中貯筆硯韻畧刀子礪石箋紙數十幅并小樂器之屬備酒炙三五人之具門生侍行出郊野遇園亭有竹樹之處燕賞終日賦詩品小管盡醉而歸 胡孝轅發籤公宴合樂每酒行一終伶人必唱唯酒然後樂作此唐人送酒之詞本作碎音今多作平聲文士亦感之葉石林引王仁裕詩淑景易從風雨去芳尊須用管弦催為證然仁裕本集自作開字下聯仍有催韻石林不知據何本也 全唐詩話 仁裕大散關句云鐵鎖寨門有白日大張旗幟插青天

上梓潼山

從蜀後王幸秦川作

綵杖拂寒烟鳴騶在半天黃雲生馬足白日下松巔盛德安疲俗仁風扇極邊前程問成紀此去上三千

題劍門

和蜀後王作

孟陽曾有語刊在白雲稜李杜常挨托孫劉亦恃憑庸

才安可守上德始堪矜暗恨長天路濃巒蔽幾層

荆南席上咏胡琴妓一首

天下大定錄云荆南高氏先建渚宮于府西北隅延袤十餘里亭榭

花木甚盛從海紹立尤加完茸甲招伶倫樂籍間多有梁園舊物從海明音律僻好胡琴有女妓數十皆其善其事仁裕使荆渚從海開宴出十妓彈胡琴為詩美之

紅粧齊抱紫檀槽一絃朱絃四十條湘水凌波慚鼓瑟秦樓明月罷吹簫寒敲白玉聲偏婉暝逼黃鸝語自嬌丹禁舊臣來側耳骨清神爽似聞韶玉纖挑落折冰聲散入秋空韻轉清二五指中勾塞鴈十三絃上轉春鶯譜從陶室偷將妙曲向秦樓寫得成無限細腰宮裡女就中偏愜楚之王情

題麥積山天堂

玉堂閒話云麥積山者北跨清渭南漸雨當固巒巖起一石高萬尋其青雲之半梯空架險有散花

樓由西閣懸梯而上有萬菩薩堂並就石鑿成自此室之上有一龕謂之天堂空中倚一獨梯至此萬中無一人敢登者仁裕獨登之仍題詩于天堂西壁

前唐末辛未年也

躡盡懸空萬仞梯等閒身共白雲齊
簷前下視群山小堂上平分落日低
絕頂路危人少到古巖松健鶴頻棲
天邊為要留名姓拂石殷勤手自題

題斗山觀

玉堂閒話云興元斗山觀自平川聳起一山四面懸絕其上

方於斗底故號之有唐公昉飲李八百仙酒全家拔宅之跡仁裕辛巳歲為節度判官嘗以片板題詩于觀癸未年入蜀因謁嚴真觀見斗山詩牌在焉不知所來舊說雲斗山一洞與嚴真觀井相通也

霞衣欲舉醉陶陶

公昉家飲八百洗瘡酒醉而上昇

不覺全家住絳霄拔宅只

知雞犬在上天誰信路岐遙
三清遼廓拋塵夢八景雲

烟事早朝為有故林蒼柏健
露華涼葉鎖金甍

題孤雲絕頂淮陰祠

玉堂閒話云興元之南有大竹路通巴州深谿峭巖捫蘿一上三日遠山頂復登嶺其

絕頂謂之孤雲兩角彼中諺云孤雲兩角去天一握淮陰侯祠在焉黃漢祖不用韓信遜歸西楚蕭相國追之及于茲山故立廟貌仁裕嘗佐褒梁帥王

思同南伐巴人往返登陟留題于祠

一握寒天古木深
路人猶說漢淮陰
孤雲不掩興亡策
兩角曾懸去住心
不是冕旒輕布素
豈勞丞相遠追尋
當時若放還西楚
尺寸中華未可侵

和韓昭從駕過白衛嶺

龍旆飄飄指極邊
到時猶更二三千
登高曉蹋巉巖石
冒冷朝衝斷續烟
自學漢皇開土宇
不同周穆好神仙

秦民莫遣無恩及大散關東別有天

賀王溥入相 石林詩話云仁裕知貢舉取王溥為狀元時年二十六後六年溥拜相時仁裕猶致仕無恙賀以詩曰

一戰文場拔趙旗便調金鼎佐無為白麻驟降恩何極
黃髮初聞喜可知跋勅案前人到少築沙堤上馬歸遲
立班始得遙相見親洽爭如未貴時

與諸門生春日會飲繁臺賦

柳陰如霧絮成堆又引門生飲古臺淑景即隨風雨去
芳樽宜命管絃開謾誇列日鳴鐘貴寧免朝烏夜兔催
爛醉也須詩一首不能空放馬頭回

示諸門生 談錄云仁裕知貢舉時已年高有數子皆早亡諸孫並幼一日生徒畢集出詩戲曰

二百一十四門生春風初長羽毛成擲金換得天邊桂

鑿壁偷將榜上名何幸不才逢聖世偶將疎網罩群英

衰翁漸老兒孫小異日知誰略有情 五代史補陶穀讀三四聯曰大奇大奇不意王仁裕

今日做賊頭也

過平戎谷弔胡 翹有文學佐荆湖藩幕善草軍書茂視副軍歲構之主帥盡室坑平戎谷仁裕過而弔之

立馬荒郊滿目愁伊人何罪死林邱風號古木悲長在
雨濕寒莎淚暗流莫道文章為衆嫉只應輕薄是身讐
不緣魂寄孤山下此地堪名鸚鵡洲

奉詔賦劍州途中鷲獸 蜀後主幸秦川至劍州西鷲獸于路左叢林間躍出搏一人去至行宮顧

問臣僚皆陳恐懼命仁裕及李浩弼等賦之後主覽之大咲曰二臣之詩各有旨

劍牙釘舌血毛腥窺窺勞心豈暫停不與大朝除患難
惟於當路食生靈從將尸口資嚙口未委三丁稅幾丁
今日帝王親出狩白雲巖下好藏形

放猿

仁裕從事漢中有獻猿兒者憐其黠慧育之名曰野
賓經年壯大跳擲頗為患繫紅納于頸題詩送之

放爾丁寧復故林舊來行處好追尋月明巫峽堪憐靜
路隔巴山莫厭深棲宿免勞青嶂夢躋攀應愜白雲心
三秋果熟松梢健任抱高枝徹曉吟

遇所放猿再作

仁裕罷職入蜀行次漢江孺蟠冢廟前見一巨猿
捨群而前於道畔古木間垂身下顧紅綃宛在以

野賓呼之聲聲應立馬移時
不覺惻然遂繼之一篇云

蟠冢祠前漢水濱飲猿連臂下嶙峋漸來子細窺行客

認得依稀是野賓月宿縱勞羈縲夢松餐非復稻梁身
數聲腸斷和雲叫識是前時舊主人

符彥卿

彥卿字冠侯陳州宛邱人後唐中書令存審之

子漢乾祐中加中書令封魏國公歸宋卒

劉谷清
瑱高議

大夫丞相李公昉嘗言當日目外鎮為麗官符彥
卿知汴州有詩云云公之詩意蓋有憾之詞爾

知汴州作

全軍十萬擁雄師正是酬恩報國時汴水波濤喧鼓角
隋堤楊柳拂旌旗前驅紅旆關西將環坐青蛾趙國姬
為報長安冠蓋道鹿麕官到底是男兒

趙逢

逢字常夫媯州懷戎人漢乾祐中擢甲科授祕書郎直史館入宋官諫議大夫卒

宋史逢敏歷清近所至有聲然傷慘

酷又言多詆訐故縉紳目之為鐵櫛

懷夢英太師

林巒影裡有清賢與我相知二十年書札愛工精玉篆利名拋捨住金田吟容賈島稱詩匠醉許劉伶作酒仙別後近聞棲華嶽亂雲應得恣情眠

王著

著字成象單州單父人漢乾祐中進士官至翰

林學士入宋卒

贈夢英大師

到處聞人乞篆蹤學來年久有深功墨池潤類湘江水筆冢高齊太華峰金錫罷飛新解虎鐵盃收掌舊降龍知師吟戀烟村景不肯回頭望九重

許仲宣

仲宣字希粲青州人漢乾祐中進士官至太子

中允入宋卒

宋史仲宣為濟陰主簿時令與簿分掌縣印令畜嬖妾與其室爭寵令弗能禁嬖妾陷其主竊取其

印藏之封識如故以授仲宣翼日署事發匣則無其印因逮捕縣吏數輩及令簿家人下獄鞫問果得之於令舍竈突中令聞之倉皇失措仲宣處之晏然人服其量

清洛喜英公大師相訪

方袍紫染出彤庭久在林泉養性靈無事撓心長見醉
有名傳世不曾醒多年別我頭先白此日逢師眼倍青
記得上都相會否夜飛杯篆老君經

鍾離權

離權咸陽人自言生於漢遇江南許堅授仙訣
又遇華陽真人上仙王元甫傳道入崆峒山自

號雲房先生宣和書譜神仙鍾離先生名權不知何時人間出接
物自謂生于漢呂洞賓于先生執弟子禮自稱天下

都散漢字畫飄然有凌雲氣 事寔類苑邢州開元寺僧院有五代時
隱士鍾離權草書詩三絕筆勢迥逸其詩云云後從廣知邢州勒詩于
石

示太原學士

風燈泡沫兩相悲未肯遺榮自保持頷下藏珠當猛取
身中有道更求誰才高雅稱神仙骨知照靈如大寶龜
一半青山無買處與君攜手話希夷

雲麓漫抄莊綽跋云昔維
揚有何仙姑者世以為謫
仙能與真靈接一日鍾離過之使治黃素乃書此詩呂公亦跋其後令侯王學士至
授之後數日王古敏仲自貳卿出守會稽至維揚訪始即以與之王祕不以示人

草書詩

露滴紅蘭玉滿畦閑拖象履到峯西但令心似蓮花潔
何必身將槁木齊古塹細香紅樹老半峯殘雪白猿啼
雖然不是桃花洞春至桃花亦滿溪

夷堅志淳熙十一年溧陽翁斗
子坐盜官米黥配而籍其家得
草書二軸題云庚申歲書其名權花押止如一劍之狀蓋鍾離翁也其詞云云李粹伯跋
之曰字畫放逸有翔龍舞鳳之勢脫去尋常畦徑非得于心而應于手者不能爾飄然

神仙風度固有所本云真本藏于建康府治軍質庫絹素標飾處皆斷裂獨字畫不動景裴嘗見之庚申歲者豈非藝祖創業建隆元年乎

題長安酒肆壁三絕

坐臥常携酒一壺不教雙眼識皇都乾坤許大無名姓
疎散人中一丈夫

得道真僧不易逢幾時歸去願相從自言任處連滄海
別是蓬萊第一峯

莫厭追歡笑語頻尋思離亂好傷神閑來屈指從頭數
得見清平有幾人

全五代詩卷十四

羅江李調元雨村編

漢

呂巖

巖字洞賓禮部侍郎渭之孫蒲坂縣人咸通中
舉進士不第遊長安值黃巢亂隱居終南山漢
時遇鍾離權得道年百餘歲貌如嬰兒世傳有

劍術時至陳搏室不知所終全唐詩話洞賓遊長沙持小瓦罐乞錢得錢無算而

罐常不滿有僧驅一車錢戲曰汝罐能容之否及推車入罐夏夏有聲俄不見僧曰神仙耶術耶呂仙口占答之曰非神亦非仙非術亦非幻天地有終窮桑田幾遷變身因非我有財亦何足戀曷不從吾遊騎鯨騰汗漫談苑張洎家居城外有一隱士自云呂巖洎倒

屣迎之索紙筆八分書七言一章頗言將作鼎駕之意其末句云功成當在破瓜年俗以破瓜字為二八而卒乃其應也仙翁詩人多傳誦飲海龜兒人不識燒丹符子鬼難看又一粒粟中藏世界半升鐵裡煮山川之句 蒙齋筆談洞賓呂眉之後五代間從鍾離權遊權漢人不老自本朝以來與權更出沒人間權不甚多而洞賓蹤跡數見好道者每以為口寔余記童子時見大父魏公自湖外罷官還道岳州客有言洞賓事者云近歲常過城南一古寺題三詩壁間而去說者云寺有一大古松自始至時無能知者有老人自松顛徐下致恭故詩云然 西溪叢語襄漢隱者躬耕數畝因古冢為亭往來題詩甚富一日柱間得一絕云冢上為亭鬼莫嗔冢頭人即冢中人凭欄莫起存亡意除卻空虛總是塵相傳呂翁作也 王漁洋五代詩話回仙有心匿春一闕明內丹之旨語意深妙惜乎世人但歌其詞不究其理吾故表而顯之云七返還丹在人先須煉已待時正一陽初動中宵漏水温温鉛鼎光透簾幃造化爭馳虎龍交合進火功夫尤關危曲江上看月華瑩淨有箇鳥飛當時自飲刀圭又誰信無中養就兜辨水源清濁木金間隔不因師指此事難知道要元微天機深遠下手速脩脩猶太遲蓬萊路仗三千行滿獨步雲歸 調元按呂巖唐末宋初人未知何時得道今據王漁洋五代詩話故入五代又其所師鍾離權故

編於漢末鍾後

埽頭坯歌

埽頭坯隨雨破抵是未曾經水火若經水火燒成磚留
 向世間住萬年稜角堅完不復壞扣之聲韻堪磨鐫凡
 水火尚成功堅完萬物誰能同脩行路上多少人窮年
 煉養費精神不道未曾經水火無常一旦臨君身既不
 悟終不悔死子猶來借精髓主持正念大艱辛一失人
 身為異類君不見洛陽富鄭公說與金丹如盲聾執迷
 不悟脩真理焉知潛合造化功又不見九江張尚書服
 藥失明神氣枯不如還丹本無質翻餌金石何太愚又
 不見三衢趙樞密忝神作鬼終不識修完外體在何邊

辯捷語言終不寔瑤頭坯隨雨破便似脩行這幾箇大
丈夫超覺性了盡空門不為證伏羲傳道至于今窮理
盡性至於命了命如何是本元先認坎離并四正坎離
即是真常家見者超凡須入聖坎是虎離是龍二體本
來同一宮龍吞虎啣居其中離合浮沈初復終剝而復
否而泰進退往來定交會弦而望明而晦消長盈虛相
匹配神仙深入水晶宮時飲醍醐清更醴餌之十日功
便成金筋玉骨身已輕此箇景象惟自身上昇早得朝
三清三清聖位我亦有本來只奪乾坤精飲凡酒食醴
腥補養元和冲更盈自融結轉光明變作珍珠飛玉京

須臾六年腸不餒血化白膏體難毀不食方為真絕糧
真氣薰蒸肢體強既不食超百億口鼻都無凡喘息真
人以踵凡以喉從此真凡兩邊立到此遂成無漏身胎
息丹田湧真火老氏自此號嬰兒火候九年都經過留
形住世不知春忽爾天門頂中破真人出現大神通從
此天仙可相賀聖賢三教不異門昧者勞心休恁麼有
識自愛生有形終不滅歎愚人空駕說愚人流蕩無則
休落趣循環幾時徹學人學人細尋覓且須研究古金
碧金碧參同不計年妙中妙兮元中元

贈劉方處士

六國愁看沉與浮携琴長歎出神州擬向煙霞煮白石
偶來城市見丹邱受得金華出世術期於紫府駕雲遊
年來摘得黃巖翠琪樹參差連地肺露飄香隴玉苗滋
月上碧峰丹鶴唳洞天消息春正深仙路往還俗難繼
忽因乘興下白雲與君邂逅於塵世塵世相逢開口希
共論太古同流志瑤琴寶瑟與君彈瓊漿玉液勸我醉
醉中亦話興亡事云道總無珪組累浮世短景倏成空
石火電光看即逝韶年淑質曾非固花面玉顏還作土
芳樽但繼曉復昏樂事不窮今與古何如識箇元元道
道在杳冥須細考壺中一粒化奇物物外千年功力與

但能制得水中華水火翻成金丹竈丹就人間不久居
自有碧霄元命誥元洲陽谷悉可居地壽天齡永相保
鸞車鶴駕逐雲飛迢迢瑤池應易到耳聞爭戰還傾覆
眼見奸華成枯槁唐家舊國盡荒蕪漢室諸陵空白草
蟬蛸世界寔足悲槿花性命莫遲遲珠璣溢屋非為福
羅綺滿箱徒自危志士戒貪昔所重達人忘欲寧自期
劉方劉方審聽我流光迅速如飛過陰媿果決用心除
尸鬼因循為汝禍八瓊秘訣君自識莫待鈔空車又破
破車壞鈔須震驚直遇伯陽應不可悠悠憂家復憂國
耗盡三田元宅火咫尺元闕若要開凭君自解黃金鎖

勉牛生夏侯生

二秀才二秀才兮非秀才非秀才兮是仙才中華國裡
親遭遇仰面觀天笑眼開鶴形兮龜骨龍吟兮虎顏我
有至言相勸勉願君兮勿猜勿猜但煦日吹月嚙雨呵
雷火寄冥宮水濟丹臺金木交而土歸位鉛汞分而丹
露胎赤血換而白乳流透九竅兮動百骸然然卷然然
舒哀哀嗒嗒孩兒喘而不死腹空虛兮長齋酬名利兮
狂歌醉舞酬富貴兮麻襪莎鞋甲子問時休記看桑田
變作黃埃青山白雲好居住勸君歸去來兮歸去來

題四明金鵝寺壁

方丈有門出不鑰見箇山童露雙脚問伊方丈何寂寥
道是虛空也不著聞此語何欣欣主翁豈是尋常人我
來謁見不得見謁心耿耿生埃塵歸去也波浩渺路入
蓬萊山杳杳相思一上石樓時雪晴海濶千峰曉

長短行

落魄且落魄夜宿鄉村朝遊城郭閑來無事翫青山困
來街市貨丹藥賣得錢不算度酤美酒自斟酌醉後吟
哦動鬼神任意日頭向西落

贈江州大平觀道士

落魄薛高士年高無白髭雲中閑臥石雪裡去尋碑誇

我飲大酒嫌人念小詩不知甚麼漢一任輩流嗤

通道

通道復通元名留四海傳交親一柱杖活計兩空拳要
果逡巡種思茶逐旋煎豈知來混世不久却回天

六言

春暖群花半開逍遙石上徘徊獨携玉律丹訣閑踏青
莎碧苔古洞眠來九載流霞飲幾千杯逢人莫話他事
笑指白雲去來

送鍾離雲房

功滿東來際會難又聞東去上仙壇杖頭春色一壺酒

頂上雲攢五嶽冠飲酒龜兒人不識燒山符子鬼難看
先生去後身須老乞與貧儒換骨丹

贈劍客二首

髮頭滴血眼如鰲吐氣雲生怒世間爭耐不平千古事
須期一訣蕩兇頑蛟龍斬處翻滄海暴虎除時拔遠山
為滅世情兼負義劍光腥染點痕斑

雨雪霏霏天已暮金鍾滿勸撫焦桐詩吟席上未移刻
劍舞筵前疾似風何事行杯當午夜忽然怒目便騰空
不知誰是虧忠孝攜箇人頭入坐中

仙詩

落魄紅塵四十春無為無事信天真生涯只在乾坤鼎
活計惟憑日月輪八卦氣中潛至寶五行光裏隱元神
桑田改變依然在永作人間出世人

我家勤種我家田內有靈苗活萬年花似黃金苞不大
子如白玉顆皆圓栽培全賴中宮土灌溉須憑上谷泉
直候九年功滿日和根拔入大羅天

尋常學道說黃芽萬水千山竟轉老有畛有園難下種
無根無脚自開花九三鼎內烹如酪六一爐中結似霞
不日成丹應換骨飛升遙指玉皇家

纔吞一粒便安然十二重樓九曲連庚虎循環餐絳雪
甲龍天喬迸靈泉三三上應三千日九九中延九萬年
須得有緣方可授未曾輕泄與人傳

誰識寰中達者人生平解法水中銀一條拄杖撐天地
三尺昆吾斬鬼神大醉醉來眠月洞高吟吟去傲紅塵
自從悟裏終身後贏得蓬壺永劫春

本末無非在玉都亦曾陸地作凡夫吞精食氣先從有
悟理歸真便入無水火自然成既濟陰陽和合自相符
爐中煉出延壽藥溟渤從教變復枯

杳杳冥冥莫問涯雕蟲篆刻道之華守中絕學方知奧
抱一無言始見佳自有物如黃菊藥更無色似碧桃花

休將心地虛勞用煮鐵燒金轉轉差

還丹功滿未朝天且向人間度有緣拄杖兩頭擔日月
葫蘆一箇隱山川詩吟自得閑中句酒飲多遺醉後錢
若問我脩何妙法不離身內永和鉛

舉世何人悟我家我家別是一榮華盈箱貯積登仙錄
滿室收藏伏火砂頓飲長生天上酒常栽不死洞中花
凡流若問吾生計遍地紛紛五彩霞

亂雲堆裏表星都認得深藏大丈夫綠酒醉眠閑日月
白蘋風定釣江湖長將氣度隨天道不把言詞問世徒
山水路遙人不到茅君消息近知無

鶴為車駕酒為糧為戀長生不死鄉地脉尚能縮得短
人年豈不展教長星晨徃徃壺中見日月時時衲裏藏
若欲時流親得見朝朝不離水銀行

世上何人會此言休將名利挂心田等閑倒盡十分酒
遇興高吟一百篇物外烟霞為伴侶壺中日月任嬋娟
他時功滿歸何處直駕雲車入洞天

公卿雖貴不曾酬說著仙鄉更去遊為討石肝逢蜃海
因尋甜雪過瀛洲山川醉後壺中放神鬼閑來匣裡收
據見目前無箇識不如杯酒混凡流

曾邀相訪到仙家忽上崑崙宴月華玉女控龍蒼獬豸

山童提挈白蝦蟆時斟海內千年酒慣摘壺中四序花
今在人寰人不識看看揮袖入烟霞

火種丹田金自生重重樓閣自分明三千功行百旬見
萬里蓬萊一日程羽化自應無鬼錄玉都長是有仙名
今朝得赴瑤池會九節幢幡洞裏迎

莫怪愛吟天上詩蓋緣吟得世間稀慣餐玉帝宮中飯
曾著蓬萊洞裡衣馬踏日輪紅露捲鳳銜月角擘雲飛
何時再控青絲轡又掉金鞭入紫微

雲鬢雙明骨更輕自言尋鶴到蓬瀛日論藥草皆知味
問著神仙自得名簪冷夜龍穿碧洞枕寒晨虎臥銀城

來春又擬携筇去為憶軒轅海上行

龍精龜眼兩相和丈六男兒不柰何九盞水中煎赤子
一輪火內養黃婆月圓自覺離天網功滿方知出地羅
半醉好吞龍鳳髓勸君休更認彌陀

強居此境絕知音野景雖多不合吟詩句若喧卿相口
姓名還動帝王心道袍薜帶應慵挂隱帽皮冠尚懶簪
除此更無餘箇事一壺村酒一張琴

欲陪仙侶得身輕飛過蓬萊徹上清朱頂鶴來雲外接
紫鱗魚向海中迎姮娥月桂花先吐王母仙桃子漸成
下瞰日輪天欲曉定知人世久長生

四海皆忙幾箇閑時人口內說塵緣知君有道來山上
何似無名住世間十二樓臺藏秘訣五千言內隱元關
方知鼎貯神仙藥乞取刀圭一粒看

當年詩價滿皇都掉臂西歸是丈夫萬頃白雲獨自有
一枝丹桂阿誰無閑尋渭曲漁翁引醉上蓮峰道士扶
他日與君重際會竹溪茅舍夜相呼

傾側華陽醉再三騎馬遇晚下南巖眉因拍劍留星電
衣為眠雲惹碧嵐金液變來成雨露玉都歸去老松杉
曾將鐵鏡照神鬼霹靂搜尋火滿潭

琴劍酒碁龍鶴虎逍遙落托永無憂閑騎白鹿遊三島

悶駕青牛看十洲碧洞遠觀明月上青山高隱綠雲流
時人若要還如此名利浮華即使休

別來洛汭六東風醉眼吟情慵不慵擺撼乾坤金劍吼
烹煎日月玉爐紅杖搖楚甸三千里鶴翥秦烟幾萬重
為報晉成仙子道丹期春色會稽峰

未煉還丹且煉心丹成方覺道元深每留客有錢酤酒
誰信君無藥點金洞裏風雷歸掌握壺中日月在胸襟
神仙事業人難會養性長生自意吟

鐵牛耕地種金錢刻石時童把貫穿一粒粟中藏世界
二升鐺內煮山川白頭老子看垂地碧眼胡兒手指天

全五代詩 卷十四
若向此中元會得此元元外更無元
箕星昴宿下長天凡景寧教不愕然龍出水來鱗甲就
鶴冲天去羽毛全塵中教化千人眼世上人知爾雅篇
自是凡流福命薄忍教微妙畧輕傳
曾隨劉阮醉桃源未省人間欠酒錢一領布裘權且當
九天回日却歸還鳳茸襖子非為貴狐白裘裳欲比難
只此世間無價寶不憑火裏試燒看
因思往事却成愁曾讀仙經第十三武氏死時應室女
陳王沒後是童男兩輪日月從他載九箇山河一担擔
盡日無人話消息一壺春酒且醺酣

萬卷仙經三尺琴劉安聞說是知音杖頭春色一壺酒
爐內丹砂萬點金悶裏醉眠三路口閑來遊釣洞庭心
相逢相遇人誰識只恐冲天沒處尋

曾戰蚩尤玉座前六龍高駕振鳴鑾如來車後隨金鼓
黃帝旂傍戴鐵冠醉捋黑鬚三島黯怒抽霜劍十洲寒
軒轅世代橫行後直隱深巖久覓難

頭角蒼浪聲似鐘貌如冰雪骨如松匣中寶劍時頻吼
袖裏金鉞逞露風會飲酒時為伴侶能行詩句便參同
采年定赴蓬萊會騎箇生獐九色龍

九鼎烹煎一味砂自然火候放童花星辰照出青芝顛

日月能藏白馬牙
七返返成生碧霧
九還還就吐紅霞
有人奪得元珠餌
三島途中路不賒

誰解長生似我哉
煉成真氣在三台
盡知白日昇天去
剛逐紅塵下世來
黑虎行時傾雨露
赤龍耕處產瓊瑰
只吞一粒金丹藥
飛入青霄更不回

遙指高峰笑一聲
紅霞紫霧面前生
每於塵市無人識
長到山中有鶴行
時弄玉蟾驅鬼魅
夜煎金鼎煮瓊英
他時若赴蓬萊洞
知我仙家有姓名

黃芽白雪兩飛金
行即高歌醉即吟
日月暗扶君甲子
乾坤自與我知音
精靈滅跡三清劍
風雨騰空一弄琴

的當南遊歸甚處
莫交鶴去上天尋

自隱元都不記春
幾回滄海變成塵
玉京殿裡朝元始
金闕宮中拜老君
閑即駕乘千歲鶴
閑來高臥九重雲
我今學得長生法
未可輕傳與世人

隨緣信業任浮沉
似水如雲一片心
兩卷道經三尺劍
一條藜杖七弦琴
壺中有藥逢人施
腹內新詩遇客吟
一嚼永添千載壽
一丸丹點一斤金

春盡閑閑過落花
一回舞劍一吁嗟
常憂白日光陰促
每恨青天道路賒
本志不求名與利
元心只慕永兼霞
世間萬種浮沈事
達理誰能似我家

留詩與巴陵太守

真人行巴陵市太守怒其不避使案吏具其罪真入日酒醒耳頃忽失之但留詩曰

暫別蓬萊海上遊
偶逢太守問根由
身居北斗星杓下
劍挂南宮月角頭
道我醉來真箇醉
不知愁是怎生愁
相逢何事不相認
却駕白雲歸去休

贈陳處士搏

青霄一路少人行
休話興亡事不成
金榜因何無姓字
玉都必是有仙名
雲歸入海龍千尺
雪滿長空鶴一聲
深謝宋朝明聖主
解書丹詔詔先生

哭陳先生搏

天網恢恢萬象疎
一身親到華山區
寒雲去後留殘月

春雪來時問太虛
六洞真人歸紫府
千年鸞鶴老蒼梧
自從遺却先生後
南北東西少丈夫

別詩

無心獨坐轉黃庭
不逐時流入利名
救老只存真一氣
脩生長遣百神靈
朝朝煉液歸瓊壠
夜夜朝元養玉英
莫笑老人貧裏樂
十年功滿上三清

贈羅浮道士

羅浮道士誰同流
草衣木食輕王侯
世間甲子管不得
壺裏乾坤只自由
數着殘棋江月曉
一聲長嘯海山秋
飲餘回首話歸路
遙指白雲天際頭

答僧

三千里外無家客七百年來雲水身
行滿蓬萊為別館道成瓦礫盡黃金
待賓盃裡常存酒化藥爐中別有春
積德求師何患少由來天地不私親

賜齊州李希遇詩

少飲欺心酒休貪不義財
福因慈善得禍向巧姦來

贈滕宗諒

華州回道人來到岳陽城
別我遊何處秋空一劍橫

題詩紫極宮

宮門一閉入臨水憑欄立無人
和我來朱頂鶴聲急

呈鍾離雲房

生在儒家遇太平懸纓重滯布衣輕
誰能世上爭名利臣事玉皇歸上清

絕句

不用梯媒向外求還丹只在體中收
莫言大道人難得自是功夫不到頭

學道須教徹骨貧囊中只有五三文
有人問我脩行法遙指天邊日月輪

肘傳丹篆千年術口誦黃庭兩卷經
鶴觀古壇松影裡悄無人跡戶長扃

天下都遊半日功不須跨鳳與乘龍
偶因博戲飛神劍
摧却終南第一峯

朝遊百越暮蒼梧
袖裏青虵膽氣麤
三入岳陽人不識
朗吟飛過洞庭湖

吾家本住在天齊
零落白雲鑱石梯
來往八千消半日
依前歸路不曾迷

東山東畔忽相逢
握手丁寧語似鐘
劔術已成君把去
有蛟龍處斬蛟龍

朝泛蒼梧暮却還
洞中日月我為天
匣中寶劔時時吼
不遇同人誓不傳

偃巖拍手葫蘆舞
過嶺穿雲拄杖飛
來往八千須半日
金州南畔有松扉

精養靈根氣養神
此真之外更無真
神仙不肯分明說
迷了千千萬萬人

不事王侯不種田
日高猶自抱琴眠
起來旋點黃金買
不使人間作業錢

莫道幽人一事無
閑中儘有靜工夫
閉門清晝讀書罷
掃地焚香到日晡

贈劍客四首

先生先生貌獐惡
拔劍當空氣雲錯
連喝三回急急去

劍然空裡人頭落

劍起星奔萬里誅風雷時逐雨聲颯人頭攜處非人在

何事高吟過五湖

麤眉卓豎語如雷聞說不平便放杯仗劍當空千里去

一更別我二更回

龐眉鬪豎惡精神萬里騰空一躡身背上匣中三尺劍

為天且示不平人

牧童

草鋪橫野六七里笛弄晚風三四聲歸來飽飯黃昏後

不脫蓑衣卧月明

弱翁帥平涼一方士通謁有牧童牽黃犢隨之弱翁指牧童曰道人頗能賦此乎方士笑曰不煩我語是兒能之

牧童乃操筆大書云云或云方士即呂公也

潭州鶴會

這回相見不無緣滿院風光小洞天一劍當空又飛去

洞庭驚起老龍眠

贈曹先生

鶴不西飛龍不行露乾雲破洞簫清少年仙子說閑事

遙隔綵雲聞笑聲

題鳳翔府天慶觀

得道年來八百秋不曾飛劍取人頭玉皇未有天符至

且貨烏金混世流

全五言 卷十四
洞庭湖君山頌

午夜君山翫月回西隣小圃碧蓮開天香風露蒼華冷
雲在青霄鶴未來

題永康酒樓

鯨吸鰲吞數百杯玉山誰起復誰頽醒時兩袂天風冷
一朵紅雲海上來

題壁

西隣已富憂不足東老雖貧樂有餘白酒釀來緣好客
黃金散盡為收書

題黃鶴樓石照

黃鶴樓前吹笛時白蘋紅蓼滿江渚衷情欲訴誰能會
惟有清風明月知

警世

二八佳人體似酥腰間仗劍斬凡夫雖然不見人頭落
暗裏教君骨髓枯

為賈師雄發明古鐵鏡

手內青蛇凌白日洞中仙果豔長春須知物外烟霞客
不是塵中磨鏡人

題全州道士蔣暉壁

醉舞高歌海上山天瓢承露結金丹夜深鶴透秋空碧

萬里西風一劍寒

題廣陵妓屏二首

嫫母西施共此身可憐老少隔千春他年鶴髮雞皮媪
今日玉顏花貌人

花開花落兩悲歡花與人還事一般開在枝間妨客折
落來地上請誰看

題壁

崔中舉進士遊岳陽遇真人錄心園春詞詰其姓名薦之李守排戶而入惟見留詩于壁

腹內嬰兒養已成且居塵市暫娛情無端措大剛饒舌
却入白雲深處行

閑題

獨自行來獨自坐無限世人不識我惟有城南老樹精
分明知道神仙過

絕句

息精息氣養精神精養丹田氣養身有人學得這般術
便是長生不死人
斗笠為帆扇作舟五湖四海任遨遊大千沙界須臾至
石欄松枯經幾秋

恒超

恒超姓馮氏范陽人居棣州開元寺終於後漢
之乾祐

辭郡守李公恩命

虛著褐衣老浮杯道不成誓傳經論死不染利名生厭
樹遮山色憐窓向月明他時隨范蠡一棹五湖清

淨顯

淨顯五代時洛陽首座沙門後漢初卒

題廣愛寺楞伽山

靈異不能棲鳥雀幽竒終不着猿猴為經巢賊應無損
縱使秦驅也漫勞珍重昔賢留像迹陵遷谷變自堅牢

漢宗廟樂舞辭

五代史樂志曰漢宗廟酌獻樂舞文祖室奏靈長之舞
德祖室奏積善之舞翼祖室奏顯仁之舞順祖室奏聖德之舞
高祖室觀德之舞唐餘錄曰高祖追尊四祖廟且遠引漢之二祖為一室張昭
曰傳會其禮乃曰太祖高皇帝創業垂統室奏武德之舞世祖光武皇帝再造

基室奏太武之舞自如其舊而
大武即用東平王蒼詞云

武德舞

明明我祖天集休明神母夜哭彤雲書興籩豆有踐管
籥斯登孝孫致告神其降靈

靈長舞

天降祥漢祚昌火炎上水靈長建廟社潔蒸嘗羅鐘石
儼珩璜陳玉豆酌金觴氣昭感德馨香祇洛汭瞻晉陽
降吾祖福穰穰

積善舞

黍稷斯馨祖德惟明蛇告赤帝龜謀大橫雲行雨施天

成地平造我家邦
韓我璿衡陶匏在御
醍盞惟精或夏
或擊載炮載烹飲福受胙
舞降歌迎滔滔不竭
洪惟水行

顯仁舞

運極金行謝天資
水德隆禮神廊時
館布政未央宮
詰旦備明祀登歌
荅茂功雲軒臨降
久星俎薦陳豐
霽霽沈檀霧鏘鏘
環佩風縈煌升藻
藉肸蠁轉珠櫳尊
祖咸韶備貽孫書
軌同京坻長有積
宗享享無窮

章慶舞

采思曉唱雞人三
牲八簋斯陳霧集
瑤階瑣闥香生綺

席華茵珠佩貂璫
熠燿羽旄干戚紛
綸酌鬯既終三獻
凝旒何止千春阿
閣長棲綵鳳郊宮
壘奏祥麟亦伏英
靈未泯元圭運祚
重新玉宇犧樽灑
澍灑龍旂鳳轄逡
巡瞻望月遊冠冕
猶疑蒼野回輪

全五代詩卷十五

羅江李調元雨村編

周

王朴

朴字文伯東平人少舉進士為校書郎周世宗
鎮壇州辟掌書記即位遷北郭郎中獻平邊策
遷左諫議大夫知開封府事充端明殿學士世
宗慨然有平一天下之志引朴計議天下事無
不合遂決意用朴拜戶部侍郎遷樞密使留守
京師顯德六年春遣視汴口還過故相李穀弟

疾作仆于坐上昇歸卒年五十四世宗臨其喪

以玉鉞叩地大慟者數四贈侍中

五代史世宗之時外
事征伐而內脩法度

朴為人明敏多材智非獨當世之務至於陰陽律歷之法莫不通焉顯德
二年詔朴校定大曆乃削去近世符天流俗不經之學子設通經統三法以
歲軌離交朔望周變率策之數步日月五星為欽天曆六年又詔朴考正雅
樂朴以謂十二律管互吹難得其真乃以京房為律准以九尺之絃十三依
管長短寸分設柱用七聲為均樂成而和朴性剛果又見信於世宗凡其所
為當時無敢難者然人亦莫能加也世宗征淮朴留京師廣新城通道
路壯偉宏潤今京師之制多其所規為其所作樂至今用之不可變其
陳用兵之畧非特一時之策至言諸國興滅次第云淮南可最先取并
必死上寇最後止其後宋興平
定四方惟并獨後服皆如朴言

周郊祀樂章

羽衛離丹闕金軒赴泰壇珠旗明月色玉佩曉霜寒黼
黻龍衣備琮璜寶器完百神將受職宗社保長安

扈載

載字仲熙北燕人周廣順初舉進士高第拜校
書郎直史館遷監察御史遷水部員外郎翰林

學士卒

五代史載為文章以辭多自喜常次歷代有國廢興治
亂之迹為運源賦甚詳又因遊相國寺見庭竹可愛作

碧鮮賦題其壁世宗聞之遣小黃門就壁錄之覽而稱善因拜學士初
載以文知名一時樞密使王朴尤重其才薦于宰相李穀久而不用朴
以問穀曰扈載不為舍人何也穀曰非不知其才然載命薄恐不能勝
朴曰公為宰相以進賢退不肖為職何言命邪已而召拜知制誥及
為學士居歲中病卒年三十六議者為穀能知人而朴能薦士

歐陽修史論是時天子英武樂延天下奇才而尤禮文士載與張昭實
儼陶穀徐台符等俱被進用穀居數人中文辭最少尤無行昭儼數
與論議其文粲然而穀徒能先意所在以進諛取合人主事無大小
必稱美頌贊至於廣京城為木偶耕人紫芝白兔之類皆為頌以獻
其辭大抵類俳優而載以不幸早卒論議雖不及昭儼而不為穀之
也

芳草

幽芳無處無幽處恨何如倦客傷歸思春風滿舊居晚
烟迷杳靄朝露健扶踈省傍靈光看殘陽少皞區

孟貫

貫字一之建安人仕周官至大夫

江西通志貫少好學嘗遊廬山下居

其下以禮義文章節儉為當時師範人稱孟夫子 江南野錄周世宗幸廣陵貫以集獻世宗見首卷貽樓隱洞譚先生詩云不伐有巢樹多移無主花謂貫曰伐叛弔民何有巢無主之有獻朕則可他人卿將不免逐釋謁投官其詩大諫楊徽之稱之 詩史閩嶺貫性踈野喜篇章不以名宦為意大諫楊徽之稱之如寄張山人草堂云掃葉林風後拾薪小雨前

山中夏日

深山宜避暑門戶映嵐光夏木蔭溪路晝雲埋石牀心

源澄道靜衣葛藹永涼莫得紅塵裏誰知此興長

山齋早秋雨中

深居少往還卷箔早秋間雨洒吟蟬樹雲藏嘯飲山炎
蒸如便退衣葛亦堪聞靜坐得無事酒卮聊暢顏

早秋吟眺

新秋新雨後獨立對遙山去鳥望中沒好雲吟裏還長
年慙道薄明代取身閒從有西征思園林懶閉關

江邊閒步

閒來南渡口迤邐看江楓一路波濤畔數家蘆葦中遠
汀排晚樹深浦漾寒鴻吟罷慵回首此情誰與同

冬日登江樓

高樓迎古岸野步晚來登江水因寒落山雲為雪凝遠
村雖入望危檻不堪凭親老未歸去鄉愁徒自興

過秦嶺

古今傳此嶺高下勢崢嶸安得青山路化為平地行蒼
苔留虎跡碧樹障溪聲欲過一回首踟躕無限情

過王逸人園林

谷口何時住烟霞一徑深水聲離遠洞山色出疎林雪
彩從沾鬢年光不計心自言人少到猶喜我來尋

宿故人江居

渡口樹冥冥南山漸隱青漁舟歸舊浦鷗鳥宿前汀
榻懸燈坐間門對浪高相思頻到此幾番醉還醒

宿山寺

溪山盡日行方聽遠鐘聲入院逢僧定登樓見月生露
垂羣木潤泉落一巖清此景關吾事通宵寐不成

山中訪人不遇

負琴蕪杖藜特地過巖西已見竹軒閉又聞山鳥啼長
松寒倚谷細草暗連溪久立無人事烟霞歸路迷

山中答友人

偶爰春山住因循值暑時風塵非所願泉石本相宜坐

夕松陰轉吟餘蟬韻移自慙疎野甚多失故人期

酬東溪史處士

咫尺東溪路年來偶訪遲泉聲迷夜雨花片落空枝石
徑僧逢出山床鶴見移貧齋有琴酒曾許月圓期

贈棲隱洞譚先生

譚紫霄授張道陵天心
正法居廬山棲隱洞

先生雙鬢華深谷卧雲霞不伐有巢樹多移無主花石
泉春釀酒松火夜煎茶因問山中事如君有幾家

贈隱者

世路爭名利深山獨結茅安情自得所非道豈相交百
尺松當戶千年鶴在巢知君於此景未欲等閒拋

懷友人

浮世况多事飄流每嘆君路岐何處去消息幾時聞吟
裏落秋葉望中生暮雲孤懷誰慰我夕鳥自成群

懷果上人

擁錫南遊去名香幾處焚別來無遠信多恐在深雲好
月曾同步幽香省共聞相思不相見林下葉紛紛

寄伍喬

蹉跎春又晚天末信來遲長憶分携日正當搖落時獨
遊饒旅恨多事失歸期君看前溪樹山禽巢幾枝

寄山中高逸人

金華仙詩 卷十五
烟霞多放曠吟嘯是尋常猿共摘山果僧隣住石房躡
雲雙屐冷採藥一身香我憶相逢夜松潭月色涼

夏日寄史處士

掩關苔滿地終日坐騰騰暑氣冷衣葛暮雲催燭燈寂
寥知得處疎懶似無能還憶舊遊否何年別杜陵

寄李處士

僧話磻溪叟平生重赤松夜堂悲蟋蟀秋水老芙蓉吟
坐倦垂釣閒行多倚筇聞名來已久未得一相逢

寄張山人

草堂南澗邊有客嘯雲烟掃葉林風後拾薪山雨前野

橋通行逕流水入芝田琴月相親夜更深戀不眠

夏日登瀑頂寺因寄諸知己

曾於塵裏望此景在烟霄巖靜水聲近山深暑氣遙杖
藜青石路者茗白雲樵寄語為即者誰能訪寂寥

寄故園兄弟

久與鄉關阻風塵損舊衣水思和月泛山憶共僧歸村
已添隣舍溪應改釣磯弟兄無苦事不用別庭闈

寄暹上人

聞罷城中講來安頂上禪夜燈明石室清磬出巖泉欲
訪慙多事相辭恨隔年終期息塵慮接話虎溪邊

送吳夢閭歸閩

甌閩在天末此去整行衣
久客逢春盡思家冒暑歸
海雲忝晚景山瘴減晴暉
相憶吟偏苦不堪書信稀

送江為歸嶺南

舊山臨海色歸路失天涯
此別各多事重逢是幾時
江行晴望遠嶺宿夜吟遲
珍重南方客清風失所思

送人遊南越

孑然南越去替爾畏前程
見說路歧嶮不通車馬行
瘴烟迷海色嶺樹帶猿聲
獨向山家宿多應鄉思生

送人歸別業

別業五湖上殘春去路賒
還尋舊山水重到故人家
門徑掩芳草園林落異花
君知釣磯在猶喜有生涯

春江送人

春江多去情相去枕長汀
數鴈別湓浦片帆離洞庭
雨餘沙草綠雲散岸峰青
誰共觀明月漁歌夜好聽

秋江送客

秋風楚江上送子話遊遨
遠水宿何處孤舟春夜濤
浦雲沉鴈影山月照猿啼
莫為饑寒苦便成名利勞

歸鴈

春至衡陽鴈思歸塞路長
汀洲齊奮翼霄漢共成行
雪

盡翻風暖寒收度月涼直應到秋日依舊返瀟湘
韋 導

導後周官至起居郎

題施璘畫竹圖

枯籜危根繳石頭千竿交映近清流堪珍仲寶窮幽筆
留得荆湘一片秋

安鴻漸

鴻漸周世宗時洛陽人

庶齋老學叢談李慶孫有文名時謂洛陽才子安鴻漸天下文章李慶孫

題楊凝式書

端州石硯宣城管玉屋松烟紫兔毫更得孤卿老書札

人間無此五般高

何承裕

承裕韶州人周世宗時知商州官侍御入宋卒

五代史補承裕有逸才為小詞尤工與陶穀素不協世宗欲擢用承裕陶奏已之及陶之判銓一旦偃息何自外抗聲唱挽歌而入陶甚驚駭承裕曰尚書豈長生不死者耶幸甚無恙聞其一兩曲又何妨陶無以抗又承裕知商州有舉人投卷贖其詩有日暮後猿啼旅思悽之句遽曰足下此句甚佳但上句屬對未切奉為改之何不云曉來犬吠張三婦舉人大慙而去其以滑稽為務如此

寄官義英公

書札精竒已換鶯仍聞依舊臥烟蘿詩成萬首猶嫌少
酒飲千鍾不怕多鄉寺夜開雲蓋月石房寒鎖洞庭波
知師收拾南歸去為憶漁人唱楚歌

劉坦

坦後周進士第一人及第恭帝時李重進鎮淮

南辟為掌書記南部新書坦狀元及第為維揚李重進掌書記好酒李令酒庫但書記有客無多少供之尋掌

庫吏頗恡之因大書一絕于屏云云重進讀之曰小吏恡酒于書記也立命斬之坦悔而成疾

書從事廳屏上

金殿試迴新折桂將軍留辟向江城思量一醉猶難得

辜負揚州管記名

郭從義

從義其先沙陀部人父紹古事後唐武皇賜姓

李氏從義補內職晉天福初復姓郭歷事四朝

周世宗時以功加檢校太師兼中書令致仕卒

贈夢英大師

雲水僧來說我師換鵝書札轉高竒揮毫傳下千年事

貞石曾留幾處碑混俗市鄆人莫識和光蹤跡鶴應知

蓮花結社須容我不似陶潛愛酒卮

陶穀

穀字秀寔邠州新平人本唐彥謙之孫避晉諱

改姓陶歷仕晉漢至周為兵部侍郎翰林承旨

入宋加尚書卒贈右僕射所著有清異錄十國春秋穀使

于吳越王宴於碧波亭因舉酒令曰白玉石碧波亭上迎仙客穀對曰口耳王聖明天子出錢塘又王罽金鍾宴穀會穀臥病請之贈以十副

穀謝詩云乙與金鍾並眼明及出境復有井蛙休時險句人謂其狡譎
細素襟記周世宗時陶尚書穀奉使江南韓熙載遣家妓奉盤盃及
旦有書謝云巫山之麗質初臨霞侵鳥道洛浦之妖姬自至月滿鴻溝舉
朝不能會其詞熙載因詔家妓訊之云是夕適浣濯焉 國老談苑陶穀

又嘗奉使兩浙獻詩二十韻於錢俶其末云此生頭已白無路掃王門時
穀官是承郎職為學士奉命小邦獻詩已是失體復有掃門之句何辱

命之甚也 玉壺清話朝廷使陶穀使江南以假書為名寔使覘之既
至崖岸高峻譙席談笑未嘗敢為韓熙載謂所親曰觀秀寔公安也非

端人介士其守可嗟夜遣歌伎秦弱蘭詐為驛卒之女敝衣持帚灑掃
驛庭五柳乘隙因詢其迹翌日以詞贈之曰好姻緣惡姻緣只得郵亭

一夜眠別神仙琵琶撥盡相思調知音少安得鸞膠續斷弦是何年後
數日譙于澄心堂李主命玻璃巨鍾滿酌之穀毅然不顧乃出弱蘭于

席歌前闕以侑之穀慚笑不敢不酬醜罷復灌倒在吐茵尚未許罷大為
主所薄還朝日止遣數小吏餞于郊亭逮歸京卒不大用 順存錄穀米

使忠懿王宴之因食蠮螋詢其族類王命自蠮螋至蠶蟻凡十餘種以進
穀曰真所謂一蟹不如一蟹蓋以訊王也王因命進葫蘆羹曰此先王

時有此品味庖人依樣造者穀在中朝有詩云年年依樣畫葫蘆故上
以此戲焉 全唐詩話穀使南唐題云西川狗百姓眼馬包兒御厨

飯末齊正解云十二字包四字云獨眠孤館據遺以為驛中女兒所書
貢父詩話今不用願字唐人作斯音五代時作入聲陶穀詩云六簪

帽子卑兀斯是也歐陽公記陶穀詩末厥兵不曉其意余謂今人呼
秃尾犬為厥尾衣之短者亦呼為厥然則此兵正謂其末賤耳今人

不以末厥相連言之其義則是也不然則不可對卑兀斯 畫瓊錄
太祖嘗謂陶穀一雙鬼眼 續湘山野錄國初陶尚書以朝廷眷待

詞臣不厚乞罷禁林太祖曰此官職甚難作依樣葫蘆且作且作不
許罷復不進用因題玉堂云云駕幸見之愈不悅卒不大用 清異

錄予讀胡嶠茶詩露牙舊姓餘甘氏破睡當封不夜侯愛其新奇猶
子最年十二歲令效法之近晚成篇云生涼好喚雞蘇佛回味宜稱

橄欖仙爨亦文辭
之有基址者也

寄贈夢英大師

是箇碑文念得全聰明靈性自天然離吳別楚三千里

入洛遊梁二十年負藝已聞喧世界高眠長見卧雲烟

相逢與我情何厚問佛方知宿有緣

題玉堂壁

官職須由生處有文章
不管用時無堪笑翰林陶學士
年年依樣畫葫蘆

李昉

昉字明遠深州饒陽人漢乾祐中舉進士周顯
德中仕至翰林學士入宋拜中書侍郎平章事

卒諡文正有集

翰林名贊李文正公昉少時常以詩呈叔侍中覽而喜之詩曰及觀西里盛世世秉鈞衡李氏

自五代至本朝世居將相

總繼附李文正進永昌陵宮辭云奠玉五迴

朝上帝御樓三度納降

王當時群臣皆進惟文正詞最為首出所謂三降

王者廣南劉鋹西蜀孟昶

江南李煜也歷代吟譜昉有句云水光先見

月露氣早知秋佳句也

馬令南唐書賓于歸南唐為塗陽令黷貨當

死時李昉事皇朝為翰林學士

乃賓于同年進上聞

賓于繼以詩遺之云云

後主見詩貸之復其官

贈賈黃中

七歲神童古所難
賈家門戶有衣冠
十人科第排頭上
五部經書誦舌端
見榜不知名字貴
登筵未識管弦歡
從今穩上青雲去
萬里誰能測羽翰

寄孟賓于

幼携書劍別湘潭
金榜標名第十三
昔日聲塵喧洛下
近年詩價滿江南
長為邑令情終屈
縱處曹郎志未甘
莫學馮唐便休去
明君晚事未為慚

仙客

胎化仙禽性本殊
何人携爾到京都
因加美號為仙客
稱向閑庭伴野夫
驚露秋聲雲外遠
翹沙晴影月中孤

青田萬里終歸去暫處雞群莫歎吁

贈襄陽妓

峴山亭畔紅妝女小筆香牋善賦詩
顏貌共推傾國色篇章皆是斷腸辭
便牽魂夢從今日得見嬋娟在幾時
千里關河萬重意夜深無睡暗尋思

禁林春直

疎簾搖曳日輝輝直閣深嚴半掩扉
一院有花春晝永八方無事詔書稀
樹頭百啭鶯鶯語梁上新來燕燕飛
豈合此身居此地妨賢尸祿自知非

題岱宗無字碑

巨石來從十八盤離宮複道滿千山
不因封禪窮民力漢祖何緣便入關

永昌陵輓詞

丹青史筆敢虛張功德巍然軼漢唐
奠玉五回朝上帝御樓二度納降主

王溥

溥字齊物并州祁人漢乾祐中進士為秘書郎
周廣順初拜端明殿學士恭帝嗣位官同平章
事右僕射入宋封祁國公卒謚康獻有集

石林詩話五代

王仁裕知貢舉王丞相溥為狀元時年二十六後六年遂相周世宗猶及本朝以太子太保罷歸班年才四十二前此所未有也初溥拜相仁裕致

仕無恙以詩和之詩見前

謝進士張翼投詩兩軸

清河詩客本賢良
惠我新吟六十章
格調宛同羅給事
功夫深似賈司倉
登山始覺天高廣
到海方知浪渺茫
好去蟾宮是歸路
明年應折桂枝香

詠牡丹

棗花至小能成實
桑葉雖柔解吐絲
堪笑牡丹如斗大
不成一事又空枝

范質

質字文素大名宗城人後唐長興四年進士晉

天福中為翰林學士周廣順初拜中書侍郎同

中書門下平章事入宋卒封魯國公有集

邵氏開見錄魯

公舉進士和凝為主文愛其文賦疑自以第十三登第謂魯公曰君之文宜冠多士屈居十三者欲君傳老夫衣鉢耳魯公以為榮至先後為相有

獻詩者云從此廟堂添故事登庸衣鉢亦相傳周相舉兵向關京師亂魯公隱於民間一日坐封邱巷茶肆中有人貌怪陋前揖曰相公無慮時暑

中公所執扇偶書大暑去酷吏清風來故人詩二句其人曰世之酷吏冤獄何止如大暑也公他日當深究此弊因携其扇去公惘然久之後至祿廟

見一土偶短鬼貌有茶肆見者扇亦在其手中公心異焉 宋史質生之父母夢神人授以五色筆九歲能屬文晉宰相桑維翰深器之漢初加

中書舍人戶部侍郎周祖征叛每朝廷遣使齎詔處分軍事皆合機宜周祖問誰為此辭使者以質對歎曰宰相器也周祖自鄴起兵向關京

城擾亂質遷民間物色得之喜甚時大雪解袍衣之世宗不豫入受顧命恭帝嗣位加開府儀同三司封蕭國公及太祖北征為六師推戴自

陳橋還府署時質方就食閣中太祖入幸王溥魏仁浦就府謁見太祖對之嗚咽流涕具言擁逼之狀質等未及對軍校羅彥瓌舉刀擬質曰

我輩無主今日須得天子太祖叱彥瓌不退質不知所措乃與溥等降階受命卒年五十四將終戒其子吳勿請諡勿刻墓碑太宗嘗稱之曰宰相中能

循規矩慎名器持廉節無出質右者但父世宗一死為可惜爾
從子校書郎吳未奏遷秩實作詩曉之時人傳誦以為勸戒

誡兒姪八百字

昨得謝課書希於京秩之中更與遷轉余以諸
兒姪輩生長以來未諳外事艱難損益懵然莫
因抒古詩一章曉之

去年初釋褐一命到蓬邱青袍春草色白紵棄如仇適
會龍飛慶王澤天下流爾得六品階無乃太為優凡登
進士第四選升校讐官十五考叙階與爾儔如何志
夫滿意欲凌雲遊若言品位卑寄書來我求省之再三
歎不覺淚盈眸吾家本寒素門地寡公侯先子有令德

樂道尚優游生逢世多僻委任信沈浮仕宦不喜連吏
隱同莊周積善有餘慶清白為貽謀伊余奉家訓孜孜
務進脩夙夜事勤肅言行思悔尤出門擇交友防慎畏
薰猶省躬常懼玷恐掇庭闈羞童年志於學不惰為箕
裘二十中甲科頰尾化為蚪三十八翰苑步武向瀛州
四十登宰輔貂冠侍寬旒備位行一紀將何助帝猷既
非救旱雨豈是濟川舟天子未遐棄日益素餐憂黃河
潤千里草木皆浸漬吾宗凡九人繼踵昇官次門內無
白丁森森朱綠紫鵷行洎內職亞尹州從事府椽監省
官高低皆清美悉由僥倖升不因資考至朝廷懸爵秩

命之曰公器才者祿及身功者賞於世非才及非功安
得需厚利寒衣內府帛饑食太倉米不蠶復不穡未嘗
勤四體雖然一家榮豈塞衆人議顯顯十目窺齷齪千
人指借問爾與吾如何不自媿戒爾學立身莫若先孝
弟怡怡奉親長不敢生驕易戰戰復兢兢造次必於是
戒爾學干祿莫若勤道藝嘗聞諸格言學而優則仕不
患人不知惟患學不至戒爾遠恥辱恭則近乎禮自卑
而尊人先彼而後已相鼠與茅鴟宜鑒詩人刺戒爾勿
曠放曠放非端士周孔垂名教齊梁尚清議南朝稱八
達千載穢青史戒爾勿嗜酒狂藥非佳味能移謹厚性

化為凶暴類古今傾敗者歷歷皆可記戒爾勿多言多
言衆所忌苟不慎樞機災危從此始是非毀譽間適足
為身累舉世重交遊擬結金蘭契忿怨從是生風波當
時起所以君子心汪汪淡如水舉世好承奉昂昂增意
氣不知承奉者以爾為玩戲所以古人疾蘧篔與戚施
舉世重任俠俗呼為義士為人赴急難往往陷刑死所
以馬援書殷勤戒諸子舉世賤清素奉身好華侈肥馬
衣輕裘揚揚過閭里雖得市童憐還為識者鄙我本羈
旅臣遭逢堯舜理位重才不充戚戚懷憂畏深淵與薄
冰蹈之唯恐墜爾曹當憫我勿使增罪戾閉門歛蹤跡

縮首避名勢名勢不久居畢竟何足恃物盛必有衰有
隆還有替速成不堅牢亟走多顛躓灼灼園中花早發
還先萎遲遲澗畔松鬱鬱含晚翠賦命有疾徐青雲難
力致寄語謝諸郎躁進徒為爾

盧多遜

多遜懷州河內人周顯德中舉進士累官集賢
校理遷左拾遺集賢殿脩撰入宋歷中書侍郎

平章事坐事謫崖州

荅塘詩話多遜在朝行將歷代帝王
年應功臣事迹天下州郡圖誌理體

事務沿革典故括成一百二十絕詩以備應對由是每所顧問無不
知者以至踐清途登釣席皆此方耳 後山詩話太祖夜幸後池
對新月置酒召使賦詩請韻曰三子兒其
詩云云太祖大喜盡以坐間飲食器賜之

新月應制

太液池邊看月時好風吹動萬年枝誰家玉匣開新鏡
露出清光此子兒

呂端

端字易直幽州安次人以蔭補千牛備身仕周
為直史館歸宋同中書門下平章事謚文正青箱

雜記李昉呂端同薦文館
各登台輔呂公贈詩云云

贈李公

憶昔僦居明德坊官資俱是校書郎青衫共直昭文館
白首同登政事堂佐國廟謨君已展避賢榮路我猶妨

主恩至重何時報老眼相看淚兩行

送英公大師歸終南

衡岳烟蘿紫閣雲名高湖外晚遊秦清詞古學儒生業
圓笠方袍釋子身竹杖拄歸山裡寺篆書留與世間人
我疑簪組成為縛空仰吾師去路塵

梁周翰

周翰字元袞管城人周廣順二年進士為太子
中允入宋工部侍郎有集

禁林讌會

寶書驚絕耀天章飛白親題賜玉堂瑞彩上騰流素月

朗河下注映丹牆鶴盤吳嶼雙翎健鵲顧雕陵巨翼長
遊霧半收懸組練輕雲斜拂駐鸞皇墨池併獲三奇寶
翠琰俱生五色光陪讌禁林知有幸叩頭遙祝萬年觴

曹翰

翰大名人周世宗時仕至德州刺史入宋歷威

塞軍節度使卒謚武毅

青箱雜記曹翰嘗平江南有功後歸環衛數年不調一日內宴賦詩

翰以武人不豫乃自陳曰臣少亦學詩亦乞應詔太宗笑而許之曰卿武人宜以刀字為韻翰援筆立進太宗覽之惻然即自環衛驟遷

數級

內宴奉詔作

三十年前學六韜英名常得豫時髦曾因國難披金甲

金五代詩 卷十一
不為家負賣寶刀臂健尚嫌弓力軟眼明猶識陣雲高
庭前昨夜秋風起羞睹盤花舊戰袍

全五代詩卷十六

羅江李調元雨村 編

周

劉 蕙

蕙長安人周末時官榮州刺史

胡震亨云雲間朱氏得宋刻唐百家詩蕙集中

有長春節詩為宋太祖誕日蓋五代末人而入宋者

貴遊

繡衣公子宴池塘淑景融融萬卉芳珠翠照天春未老
管絃臨水日初長風飄柳線金成穗雨洗梨花玉有香
醉後不能離綺席擬憑青帝繫斜陽

夢歸故園

桐葉飛霜落井欄
菱花藏雪助衰顏
夜窗颯颯搖寒竹
秋枕迢迢夢故山
臨水釣舟橫荻岸
隔溪禪侶啟柴關
覺來依舊三更月
離緒鄉心起萬端
舊館秋寒夜夢長
水簾疎影入迴塘
官情率爾拋魚艇
客恨依然在燕梁
白鷺獨飄山面雪
紅蕖全謝鏡心香
起來不語無人會
醉倚東軒半夕陽

蜀都春晚感懷

蜀都春色漸離披
夢斷雲空事莫追
宮闕一城荒作草
王孫猶自醉如泥
誰家玉笛吹殘照
柳市金絲拂舊堤

可惜錦江無錦濯
海棠花下杜鵑啼

對雨

幽庭凝碧亦連漪
簷雷聲繁聒夢歸
半岫金烏纔委照
一川石燕又交飛
濯枝霖霖榴花吐
吹渚飄飄暑氣微
因憶故園閑釣處
蒼苔斑駁滿漁磯

春霽

春霽江山似畫圖
醉垂鞭袂出康衢
猖狂亂打鼙鼓
懶慢遲脩鴛鴦書
老色漸來欺鬢髮
閑情將欲傲簪裾
苔錢遍地知多少
買得花枝不落無

秋夕書懷

荒僻淹留歲已深，解龜無計恨艱任。守方半會蠻夷語，
賀厦全忘燕雀心。夜靜倚樓悲月笛，秋寒欹枕泣霜砧。
宦情總逐愁腸斷，一箇鱸魚直萬金。

直氣從來不入時，掩關慵更釣磻溪。斯文未喪宣尼歎，
吾道將窮阮籍悲。輕粉覆霜凝夜砌，亂金鋪菊織秋籬。
南陽臥久無人問，薄命非才有可疑。

春宵

春雲春日共朦朧，滿院梨花半夜風。宿酒未醒珠箔捲，
艷歌初闋玉樓空。五湖范蠡才堪重，六印蘇秦道不同。
再取秦琴聊假寐，南柯靈夢莫相通。

秋夕書懷呈戎州郎中

素律初迴枕簟涼，松風飄泊入華堂。譚雞寂默紗窗靜，
夢蝶蕭條玉漏長。歸去水雲多阻隔，別來情緒足悲傷。
霜砧月笛休相引，只有離襟淚兩行。

風送秋荷滿鼻香，竹聲敲玉近虛廊。夢迴故國情方黯，
月過疎簾夜正涼。菱鏡也知移艷態，錦書其柰隔年光。
鸞膠處處難尋覓，斷盡相思寸寸腸。

晚樓寓懷

薄暮疎林宿鳥還，倚樓垂袂復憑欄。月沈江底珠輪淨，
雲鎖峰頭玉葉寒。劉毅暫貧雖壯志，馮唐將老自低顏。

無言獨對秋風立擬把朝簪換釣竿

征婦怨

金閨寂寞罷妝臺玉筋闌干界粉腮花落掩關春欲暮
月圓歌枕夢初迴鸞膠豈續愁腸斷龍劍難揮別緒開
曾寄錦書無限意塞鴻何事不歸來

對鏡

青鏡重磨照白鬚白鬚閑撚意何如故園迢遞千山外
荒郡淹留四載餘風送竹聲侵枕簟月移花影過庭除
秋霜滿領難消釋莫讀離騷失意書

春燕

多時窗外語呢喃只要佳人捲_湘簾大厦已成須慶賀
高門頻入莫憎嫌花間舞蝶和_工日趁江畔春泥帶雨銜
栖息數年情已厚營巢爭肯傍他簷

春晚寓懷

一承兌澤蒞方州八度春光照郡樓好景幾將官吏醉
名山時領管絃遊空花任爾頻侵眼老雪從他漸滿頭
歸去杜陵池閣在只能歡笑不能愁

中春宴遊

二月風光似洞天紅英翠萼簇芳筵楚王雲雨迷巫峽
江令文章媚蜀箋歌黛入顰春岫斂舞衣新繡曉霞鮮

金五什言 卷五
酒闌香袂初分散笑指漁翁釣暮烟

春晚閑望

東風滿地是梨花只把琴心帶酒家
立處晚樓吹短笛望中春草接平沙
雁行斷續晴天遠燕翼參差翠幕斜
歸計未成頭欲白釣舟烟浪思無涯

秋夕書事

搖落江天萬木空雁行斜戛塞垣風
征閨擣月離愁遠舊館眠雲旅夢通
郢客豈能陪下里臯禽爭肯戀樊籠
此心曠蕩誰相會盡在南華十卷中

蓮塘霽望

新秋菡萏發紅英向晚風飄滿
郡馨萬疊水紋羅乍展一雙鷓鴣繡
初成採蓮女散天歌闋拾翠人歸
楚雨晴遠岸牧童吹短笛蓼花深處
信牛行

送從弟舍人入蜀

嘉陵江畔餞行車離袂難分十里餘
慷慨莫誇心似鐵留連不覺淚成珠
風光川谷梅將發音信雲天雁未疎
立馬舉鞭無限意會稀別遠擬何如

新迴車院筵上作

迴車院子未迴車三載疲民詠袴襦
借冠已承英王詔乞骸須上老臣書
黃金蜀柳籠朱戶碧玉湘筠映綺疏

因問滿筵詩酒客錦江何處有鱸魚

寄長安鄭員外

屈指良交十四人隙駒風燭漸為塵當初花下三秦客
只有天涯二老身乘醉幾同遊北內尋芳多共謁東隣
此時阻隔關山遠月滿江樓淚滿巾

咸陽懷古

高秋咸鎬起霜風秦漢荒陵樹葉紅七國鬪雞方賈勇
中原逐鹿更爭雄南山漠漠雲常在渭水悠悠事旋空
立馬舉鞭遙望處阿房遺址夕陽東

春怨

繡林紅岸落花鈿故去新來感自然絕塞杪春悲漢月
長林深夜泣絃絳錦書雁斷音難寄菱鏡鸞孤貌可憐
獨倚畫屏人不會夢魂纔別戍樓邊

登樓寓望

憑高多是偶汎瀾紅葉何堪照病顏萬疊雲山供遠恨
一軒風物送秋寒背琴鶴客歸松徑橫笛牛童臥蓼灘
獨倚郡樓無限意夕陽西去水東還

江岸獨步

醉卓寒筇傍水行漁翁不會獨吟情龜能顧印誰相重
鶴偶乘軒不可輕簪組百年終長物文章千古亦虛名

是非得喪皆閑事，休向南柯與夢爭。

江樓望鄉寄內

獨上江樓望故鄉，淚襟霜笛共淒涼。雲生隴首秋雖早，月在天心夜已長。魂夢只能隨蛺蝶，烟波無計學鴛鴦。蜀箋都有三千幅，總寫離情寄孟光。

命妓不至

琴中難挑孰憐才，獨對良宵酒數杯。蘇子黑貂將已盡，宋宏青鳥又空回。月穿淨牖霜成隙，風捲殘花錦作堆。欹枕夢魂何處去，醉和春色入天台。

宣賜錦袍設上贈諸郡客

十月芙蓉花滿枝，天庭驛騎賜寒衣。將同玉蝶侵肌冷，也遣金鵬遍體飛。夜臥始知多忝竊，晝行方覺轉光輝。深冬若得朝丹闕，太華峰前衣錦歸。

晨雞

朱冠金距綵毛身，昧爽高聲已報晨。作瑞莫慚先貢楚，擅場須信獨推秦。淮南也伴升仙犬，大函谷曾容借曉人。此日卑棲隨飲啄，宰君驅我亦相馴。

芳春

微雨微風隔畫簾，金爐檀炷冷慵添。桃花滿地春牢落，柳絮成堆雪棄嫌。寶瑟不能邀卓氏，綵毫何必夢江淹。

金五言
卷十一
宦情歸興休相撓
隼旆漁舟總未厭

春游

搖搖離緒不能持
滿郡花開酒熟時
羞聽黃鶯求善友
強隨綠柳展愁眉
隔雲故國山千疊
傍水芳林錦萬枝
聖主未容歸北闕
且將勤儉撫南夷

重陽感懷

重陽不忍上高樓
寒菊年年照暮秋
萬疊故山雲總隔
兩行鄉淚血和流
黃茅莽莽連邊郡
紅葉紛紛落釣舟
歸計未成年漸老
茱萸羞戴雪霜頭

載花乘酒上高山
四望秋空八極寬
蜀國江山存不得

劉家豚犬取何難
張儀舊壁蒼苔厚
葛亮荒祠古木寒
獨對斜陽更惆悵
錦江東注似波瀾

宴遊池館

綺筵金碧照芳菲
酒滿瑤卮水滿池
去歲南岐離郡日
今春東蜀看花時
儉蓮發臉當籌箸
緒柳生腰按柘枝
座客半酣言笑狎
孔融懷抱正怡怡

寄高書記

齊朝慶裔祖敖曹
麟角無雙鳳九毛
聲價五侯爭辟命
文章一代振風騷
醉琴自寄陶家意
夢枕誰聽益郡刀
補衮應星曾奏舉
北山南海孰為高

再見從弟舍人

屈指依稀十五年，鸞臺秘閣位相懸。
分飛淮甸雁行斷，重見江樓蟾影圓。
滯跡未偕朝北闕，高才方命入西川。
願君通理須還早，拜慶慈親几杖前。

春書醉眠

朱欄芳草綠纖纖，歌枕高堂捲畫簾。
處處落花春寂寂，時時中酒病恹恹。
塞鴻信斷雖堪訝，梁燕詞多且莫嫌。
自有卷書銷永日，霜華未用鬢邊添。

春夕寓興

忘憂何必在庭萱，是事悠悠竟可寬。
酒病未能辭錦里，

春狂又擬入桃源。
風吹楊柳絲千縷，月照梨花雪萬團。
閑泥金徽度芳夕，幽泉石上自潺湲。

訪飲妓不遇招酒徒不至

小橋流水接平沙，何處行雲不在家。
畢卓未來輕竹葉，劉晨重到蹀桃花。
琴樽冷落春將盡，幃幌悵蕭條日又斜。
回首却尋芳草路，金鞍拂柳思無涯。

春宴河亭

柳擺輕絲拂嫩黃，檻前流水滿池塘。
一筵金翠臨芳岸，四面烟花出粉牆。
舞袖逐風翻繡浪，歌塵隨燕下雕梁。
蠻箋象管休凝思，且放春心入醉鄉。

蜀都道中

劍閣雲棧亂崢嶸得喪何由險與平千載龜城終失守
一堆鬼錄漫留名季年必不延昏主薄賞那堪激懦兵
李特後來多二世納降歸擬畫公卿

萬葛樹

葉如羽蓋豈堪論百步清陰鎖綠雲善政已聞思召伯
英風偏稱號將軍靜鋪講席麟經潤高拂闕枝兔影分
更有歲寒霜雪操莫將樗櫟擬相群

春夕遣懷

窮通分定草淒涼且放歡情入醉鄉范蠡扁舟終去

馮唐半世只為郎風飄玉笛梅初落酒汎金樽月未央
休把虛名撓懷抱九原邱隴蓋侯王

新蟬

齊女屏幃失舊容侍中冠冕有芳蹤翅翻晚鬢鬢尋香露
聲引秋絲逐遠風旅館聽時髭欲白戍樓聞處葉多紅
只知送恨添愁事誰見凌霄羽蛻功

寄滑州文秀大師

分飛屈指十三年蕊萼峰前別社蓮薄宦偶然來左蜀
孤雲何事在南燕一封瑤簡音初達兩處金沙色共圓
珍重湯休惠佳句郡齋吟久不成眠

中春登樓

金杯不似滌愁腸
江郡芳時憶故鄉
兩岼烟花春富貴
一樓風月夜淒涼
王章莫耻牛衣淚
潘岳休驚鶴鬢霜
歸去蓮花歸未得
白雲深處有茅堂
古今通塞莫咨嗟
漫把霜髯敵歲華
失手已慙蛇有足
用心休為鼠無牙
九天雲淨方憐月
一夜風高便厭花
獨倚郡樓人不會
釣舟春浪接平沙

自遣

未上亨衢獨醉吟
賦成無處博黃金
家人莫問張儀舌
國士須知豫讓心
照乘始堪沽善價
陽春爭忍混凡音

鷗鵬鱗翼途程在
九萬風雲海浪深

偶有下殤因而自遣

彭壽殤齡共兩空
幻泡緣影夢魂中
缺圓宿會長如月
飄忽浮生疾似風
修短百年先後定
賢愚千古是非同
南柯太守知人意
休問陶陶塞上翁

倦學

樂廣亡來冰鏡稀
宓妃嫫母混妍媸
且於霧裡藏元豹
休向窗中問碧雞
百氏典墳空自苦
一堆螢雪竟誰知
門前春色芳如畫
好掩書齋任所之

去年今日

全五代詩 卷五
去年今日到榮州五騎紅塵入郡樓
貔虎只知迎太守蠻夷不信是儒流
姦豪已息時將秦疲瘵全蘇歲又周
聖主若容辭重祿便歸烟水狎群鷗

晝寢

花落青苔錦數重書淫不覺避春慵
恐倩枕上飛莊蝶任爾雲間騁陸龍
玉液未能消氣魄牙籤方可滌昏蒙
起來已被詩魔引窗外寒敲翠竹風

郡齋寓興

依約樊川似旭川郡齋風物盡蕭然
秋庭碧蘚鋪雲錦晚閣紅蕖簇水仙
醉筆語狂揮粉壁歌梁塵亂拂花鈿
情懷放蕩無羈束地角天涯亦信緣

郡樓閑望書懷

郡樓樓閣繞江濱風物清秋入望頻
銅鼓祭龍雲塞廟蘆花飄鷺雪粘人
蓮披淨沼羣香散鷺點寒烟玉片新
歸去杜陵池館在且將朝服拂埃塵

玉燭花

娟娟香英三四枝亭亭紅艷照階墀
正當晚檻初開處却似春闈就試時
少女不吹方熠燿東君偏惜未離披
夜深斜倚朱欄外擬把隣光借與誰

從弟舍人惠茶

全五代詩 卷五
曾求芳茗貢燕詞果沐頒露味甚奇龜背起紋輕炙處
雲頭翻液乍烹時老丞倦悶偏宜矣舊客過從別有之
珍重宗親相寄惠水亭山閣自携持

再看光福寺牡丹

去年曾看牡丹花蛺蝶迎人傍彩霞今日再遊光福寺
春風吹我入仙家當筵芬馥歌唇動倚檻嬌羞醉眼斜
來歲未朝金闕去依前和露載歸衙

海棠花

淡淡微紅色不深依依偏得似春心烟輕虢國顰歌黛
露重長門斂淚衿低傍繡簾人易折密藏香藥蝶難尋

良宵更有多情處月下芬芳伴醉吟

新竹

近窗臥砌兩三叢佐靜添幽別有功影鏤碎金初透月
聲敲寒玉乍搖風無憑費叟烟波碧莫信湘妃淚點紅
自是子猷偏愛爾虚心高節雪霜中

木芙蓉

素靈失律詐風流強把芳菲半載偷是葉歲蕤霜照夜
此花爛熳火燒秋謝蓮色淡爭堪種陶菊香穠亦合羞
誰道金風能肅物因何厚薄不相侔

送二郎君歸長安

我兒辭去淚雙流蜀郡秦川兩處愁紅葉滿山歸故國
黃茅徧地住他州荷衣曉挂慙官吏菱鏡秋窺訝鬢髩
好向雲泉營舊隱莫教莊叟畏犧牛

送文英大師

屈指平陽別社蓮蟾光一百度曾圓孤雲自在如何處
薄宦參差亦信緣山郡披風方穆若花時分袂更淒然
搖鞭相送嘉陵岼回首群峰隔翠烟

酬勾評事

閑庭欹枕正悲秋忽覺新編浣遠愁才薄只愁安雁戶
夷人內有雁戶蓋
被移不定之故也年高空憶復漁舟鷺翹皓雪臨汀岼蓮嫋

紅香匝郡樓對景却慙無藻思南金荆玉卒難酬

初至郡界

嘉陵江畔接榮川兩畔旌旗下瀨船郡印已分炎瘴地
朝衣猶惹御爐烟蓮塘小飲香隨艇月榭高吟水壓天
錦字莫嫌歸路遠華夷一統太平年

到郡後有寄

蜀路新修盡坦平交親深幸再逢迎正當返袂思鄉國
却似歸家見弟兄霑澤只慙堯綯重泝流還喜范舟輕
欲將感戀裁書首多少魚箋寫得成

長春節

聖朝佳節遇長春
跪捧金爐祝又焚
寶藏發來天地秀
兵戈銷後帝皇尊
太平基址千年永
混一車書萬古存
更有馨香滿芳檻
和風遲日在蘭蓀

登郡樓書事

偶奉綸書蒞旭川
郡樓嘉致盡依然
松歌鳥道雲藏寺
月滿漁舟水浸天
望帝古祠花簇簇
錦城歸路草芊芊
有時倚檻垂雙袂
故國風光似眼前

旭川祁宰思家而卒因述意呈秦川知己

歲稔民康絕訟論
政成公暇自由身
朝看五馬閑如社
夜擁雙姬煖似春
家計不憂憑冢子
官資無愧是朝臣

豈同齷齪祁員外至死悲涼一婦人

登郡樓書懷

烟雨樓臺漸晦冥
錦江澄碧浪花平
卞和未雪荆山耻
莊鳥空傷越國情
天際寂寥無雁下
雲端依約有僧行
登高欲繼離騷詠
魂斷愁深寫不成

邊郡荒涼悲且歌
故園迢遞隔烟波
琴聲背俗終如是
劍氣衝星又若何
朝客漸通書信少
釣舟頻引夢魂多
北山更有移文者
白首無塵歸去麼

莫嗔阮氏哭途窮
萬代深沈恨亦同
瑞玉豈知將抵鵲
鉛刀何事却屠龍
九夷歆適嗟吾道
五柳終歸效古風

全五言
獨倚郡樓無限意滿江烟雨正冥濛

偶聞官吏舉請輒有一篇寄從弟舍人

官吏潛陳借寇詞官情鄉夢兩相違青城錦水無心住
紫閣蓮峰有意歸張翰鱸魚因醉憶孟光書信近春稀
黃茅瘴色看看起貪者猶疑別是機

誠是非

巧舌如簧總莫聽是非多自愛憎生三人告母雖投杼
百犬聞風只吠聲辨玉且寬和氏罪誣金須認不疑情
因思疇昔遊談者六國交馳亦受烹

簡豎儒

蹄涔豈信有滄浪螢火何堪並太陽淵奧未曾探禹穴
矜誇更擬越邱牆小巫神氣終須怯下里音聲必不長
近日冰壺多晦昧虎皮羊質也觀光

貽諸學童

橫經叉手步還趨積善方知慶有餘五箇小雛離學院
一行新雁入貧居攘羊告罪言何直舐犢牽情理豈虛
勸爾立身須苦志月中丹桂自扶踈

春夜

薄薄春雲籠皓月杏花滿地堆香雪醉垂羅袂倚朱欄
小數玉仙歌未闕

春遊

柳成金穗草如茵
載酒尋花共賞春
先入醉鄉君莫問
十年風景在三秦

中夏晝卧

寂寂無慘九夏中
傍簷依壁待清風
壯圖竒策無人問
不及南陽一卧龍

西齋

西齋新竹兩三莖
也有風敲碎玉聲
莫恨移來欄檻遠
譬如元本此間生

